



Tingim Wol  
AIDS De

Givim olgeta  
Famili na Poroman or Poromeri  
wanpela naispela  
**KRISMAS KAD**  
long dispela yia!

Ful kala na traipela print antap long olgeta glosi kad wantaim ol envelop

## K2.20

lon wanwan sais (A6) pepa  
Oda mak inap long 100 kopi tasol

\* Wanpela singel kala wol or piksa tasol, ino wantaim grafik disain\*  
• A6 105mm x 145mm

Only at...  
**THEODIST LTD**  
THE STATIONERY SUPERMARKET

WAIGANI DRIVE, POM MARKHAM ROAD, LAE  
PH: 313 9800 PH: 472 5488  
printquotepom@theodist.com.pg printquoteiae@theodist.com.pg

# Pikinini dai long Kiwai

## ...El Nino kamapim

### Aja Potabe i raitim

**WANPELA** pikinini i gat 5-pela krismas long Kiwai Ailan long Saut Flai distrik long Westen Provins i dai pinis na ol manmeri long olgeta hap long Saut Flai i kisim bikpela bagarap bi-hain long taim bilong bikpela san i kamap strong tumas na daunim mak bilong wara na kaikai.

Na mak bilong dispela hot san na drai weda em i go antap long level namba 5. Klostu taim tasol em bai go antap long level namba 6.

Dispela hot san na drai weda i mekim na laip bilong ol manmeri long Saut Flai distrik i go hat olegta.

Deputi Kodineta bilong Saut Flai Disasta opis, Segal Wape i mekim dispela toktok las wik Fonde long Daru ples balus.

Bihain long nesenel eksem bilong Gret 8, provin-sal gavman i pasim olgeta praimer, hai na sekendari skul insait long Saut Flai distrik, Wape i tok.

"Gret 9 na 11 sumatin tasol i skul i stap yet.

"I gat sampela sain bilong sik tu i wok long kamap. Kain sik olsem pekpek wara i wok long kamap. Mipela i prèt nogut tru bikos nogut dispela sik i kamap bikpela na bagarapim laip bilong ol

manmeri,"Mista Wape i tok.

Mista Wape i tok El Nino o ples i drai i bagarapim ol gaden kaikai na daunim mak bilong wara we ol manmeri i save kisim long dring na waswas.

Mista Wape wantaim ol senia pablik sevna na wok manmeri bilong Westen Provinsal gavman i bin kam long Daru ples balus long kisim 150 bek rais we Mineral Risos Developmen Kampani (MRDC) i givim long ol pipel bilong Saut Flai.

Em i tok kaikai na wara saplai i wok long go daun bikos hot san na drai weda i go bikpela moa yet.

"Dispela i apim mak bilong disasta o birua i go antap long level namba 5. I no long taim, mi bilip olsem mak bilong dispela disasta bai go antap long level namba 6,"Mista Wape i tok.

Em i tok tenkyu long MRDC i givim 150 bek rais long helpim manmeri Saut Flai.

"Mi tok tenkyu tru long MRDC long luksave long mipela taim mipela i kisim bikpela bagarap. Mi laik tok tenkyu long PNG Air na ExxonMobil long helpim mipela.

"Mi laik tok tenkyu long Wol Vision na Momon Sios long pastaim helpim ol i bin givim long pipel,"Mista Wape i tok.



**WOKIM SAMTING STRET:** Minista bilong Spot na Nesenel Ivens na Memba bilong Mosbi Saut, Justin Tkatchenko i toktok long ol pipel long Kone insait long NCD taim em I lonsim nupela asosiesen bilong ol Simbu long Kone setlemen. *Poto Nicky Bernard.*

**Polye: Mi bai kamap praim minista - P2**



**Faster  
Higher  
Smoother  
Quieter**

## Daily Jet services to Alotau and Hoskins on the Fokker 70

Call Toll Free on 180 3444 or contact your nearest Air Niugini Travel Centre or Travel Agent.

**Air Niugini**    
www.airniugini.com.pg

# Polye: Mi bai kamap Praim Minista

## Aja Potabe i raitim

**OPOSISEN** Lida Don Polye i tok em i gat strongpela bilip olsem em yet bai kamap neks praim minista bilong PNG.

Mista Polye i tok Gren Sif Sir Michael Somare and Sir Julius Chna, i blesim em pinis long kamap praim minista na em bilip strong olsem dispela blesing bilong tupela papa bilong kantri bai helpim em i kamap praim minista bilong kantri bilong yumi.

Tasol em no tokaut klia wanem taim stret em bai kamap praim minista.

Mista Polye i mekim dispela toktok long Sinai ples, Madang long las wik Sande, we ol Palamenteri lida na eksekutiv bilong THE Pati i bin holim pati kokas miting.

"Tupela senia stetsmen na lapun papa bilong kantri i blesim mi pinis long kamap neks praim minista.

"Tomaro tasol bai mi kamap praim minista sapos papa God i laikim me long kamap," Polye i tokim ol manmeri long Sinai ples.



**Oposisen Lida Don Polye i holim han wantaim ol asples bilong Sinai ples Madang. Raikos MP James Gau (raithan) na Lae MP Loujaya Kouza (lephan) i sanap long sait sait.**

Mista Polye i tok gavman i mekim planti nogut disisen na em i laik senisim gavman na kamap nupela praim minista husat bai putim laik bilong ol pipel i go pas.

"Yupela yet i save watpo mi tok olsem. Sapos mi kamap praim minista, bai mi putim in-tres bilong ol manmeri i go pas.

"Gavman i nau kamapim planti pasin korapsen, daunim ol rait bilong manmeri, kisim politik i go insait long sistem bilong gavman na long ol konstitusenel opis, na i wok long brukim lo na daunim pasin demokresi insait long kantri bilong yumi," Mista Polye i tok.

Mista Polye i bin go long

Madang wantaim Memba bilong Raikos, James Gau na Memba bilong Lae, Loujaya Kouza.

Praim Minista Peter O'Neill wantaim sampela ol senia gavman minista i bin go long Madang tu long las wik Mande long opim nupela Pacific Maritime Industrial Zon (PMIZ).

## PNG, USA na ol Ailan kantri i lukluk long Global Klaimet Senis

PRAIM Minista bilong Papua Niugini na Siaman bilong Pasifik Ailan Forum (PIF), Peter O'Neill na Presiden bilong Yunaitet Stet, Barack Obama, wantaim ol lida bilong ol liklik ailan kantri i wanbel long kamapim ol gol long COP-21 long luksave long klaimet senis.

Dispela posisen ol i autim long bikpela kibung namel long tupela lida na ol Presiden na Praim Minista bilong Pasifik ailan na ol narapela kantri we i lukim bikpela birua bikos long klaimet senis.

Dispela kibung em Presiden bilong Kiribati, Anote Tong, Presiden bilong Masel Ailan, Christopher Loeak na ol lida bilong Babados, ol Seikeles na Seint Lusias.

PM O'Neill i tok tenkyu long Presiden Obama long go pas long kamapim dispela kibung wantaim ol ailan kantri na tok em i wet long strongim ol bikpela isu bilong klaimet senis we i bagarapim ol laip bilong ol pipel long Pasifik.

Yunaitet Stet i gat narapela kain sans long kisim wok bilong go pas long toktok long klaimet senis, na mipela i wanbel long dispela kibung mipela i gat wantaim ol ailan kantri,' PM O'Neill i tok.

'Long Paris konpres yumi nid long makim wanpela taget we olgeta kantri i ken makim, na dispela i mas ol taget we bai i gat senis long klaimet senis,' PM O'Neill i tok.

Em i tok ol taget i no strong bai i no inap na bai mekim ol sampela kantri bai i no inap ektiv. Em i tok dispela em i rait taim bilong kamap wantaim wanpela taget.

PM O'Neill i toktok long kirapim wanpela intenesenel fan long sapotim ol komyuniti i kisim bagarap long klaimet senis. Em i tok bagarap i kamap long ol liklik ailan kantri na ol bikpela komyuniti i mas helpim ol.

# Pis opisa Suke

Nancy Suke (putim hat) bilong Makerupu viles long Hula tasol nau em i bos meri bilong Manu pis maket. Em i laik bihainim kastom bilong ples long amamas long namba wan de bilong mun Desemba na em i go baim wanpela bikpela kek wantaim ol sof dring na tilim long olgeta maket lain long Manu Auto Port maket long Tude 1 Desemba.

Em i tok olsem long ples Hula em i kastom long ol yangpela na lapun i save senisim liklik kaikai olsem bisket, kek na

dring na bilas long paora na plawa long dispela de. Tasol nau ol i bisi tru long wok maket bilong ol, olsem na Nancy i mekim dispela pasin long Manu tasol. Em i tok dispela pasin i soim olsem Krismas i kam klostu nau.

Sapos yu go long Manu Pis maket bai yu no inap abrusim dispela meri. Olgeta taim em i save tok strong long ples i mas klin na i no gat pasin bilong stil na bikhet i mas stap. Em i pis opisa stret!



**Nancy Suke (putim hat) wantaim ol pren i katim kek bilong Desemba 1 long Manu. Foto: Wantok Ripota.**

## Lae MP joinim THE Pati

### Aja Potabe i raitim

MEMBA bilong Lae, Loujaya Kouza i joinim Oposisen bihain long Gavman i rausim em i go ausait long Pipol's Nesenel Kongres (PNC) Pati bilong Praim Minista Peter O'Neill.

Mis Kouza i joinim THE Pati bilong Oposisen Lida Don Polye na dispela i apim namba bilong Oposisen i go antap long 10.

Em i sainim pinis ol pepa long lusim PNC Pati na joinim THE Pati na Oposisen Lida Polye i tok welkam long em.

Namba bilong ol memba i stap aninit long THE Pati i go antap long 5.

Mista Polye i tok em i amamas long Mis Kouza i joinim THE Pati na em i tok em bai sapotim Kouza long helpim ol meri long senisim laip bilong ol.

"Mi bilip strong olsem taim Mis Kouza i joinim THE Pati, em i no kam long apim

namba bilong pati o namba bilong Oposisen, tasol em i karim i kam gutpela lidasip kwaliti, integriti, kredibiliti na ol lidasip veliu," Mista Polye i tok.

Mista Polye i tok em i gat strongpela bilip long Mis Kouza olsem wanpela trupela lida we ol pipel bilong Lae i bin makim long mekim ol gutpela wok insait long distrik bilong em, na long kantri tu wantaim.

"Em i gat bikpela ekspirens long lidasip. Em i bin stap wanpela gavman minista na mi amams long tokaut olsem bai mi makim em kamap deputi Palamenteri lida bilong THE Pati long Momase rijon," Mista Polye i tok.

Mis Kouza i tok tenkyu long Mista Polye i gat strongpela bilip long lidasip bilong em.

Em i tok em bai wokbung wantaim Memba bilong Bulolo, Sam Basil na Gavana bilong Morobe, Kelly Naru, long kirapim provins na kantri wantaim.



**Nupela Mosin Fresh sof dring....**  
VITIS Industries em i wanpela kampani bilong PNG we i save mekim planti gutpela samting olsem kopi, sof dring, kol wara, noni jus, aloe vera, na vanila. Vitis em i save baim ol kopi bin long ol PNG manmeri na i save kamapim kopi long salim i go aut long kantri. Vitis Industries aninit long Mosin Fresh bren nem i save baim vanila bin, aloe vera, na noni long ol manmeri PNG na kamapim ol nupela sof dring. Piksa i soim Sels na Maketing Menesa bilong Vitis Industries, Thomas Palang-gat (namel) i soim wanpela kastoma long ol nupela fleiva sof drink bilong Vitis. Foto: Nicky Bernard.

**Friends love to share**

One SIM for you & one SIM for your bestie, only on the friendlier network.

76003555 or 1555  
connect@bmobile.com.pg

Supporting PNG MADE

Bestie two SIM pack K5 only

www.bmobile.com.pg

bmobile | vodafone



## Danis Tureture stail...

Piksa i soim ol man bilong Tureture nambis long Saut Flai Distrik, Westen Provins i soim stail na danis long tok welkam long Westen Gavana Ati Wobiro long Daru ples balus las wik Fonde. Gavana Wobiro wantaim ol bikman bilong PNG Air i bin kisim 150 bek rais i go daun long Daru Ailan long givim i go long ol manmeri Saut Flai husat i kisim taim long drai weda. Ol dispela Tureture man i danis long soim amamas na tok tenkyu long Gavana Wobiro na tu long tok welkam long dispela nupela ATR 72-600 balus bilong PNG Air, we i bin karim ol dispela bek rais fri i go long Daru. Tureture em i ples bilong wanpela senia stetsmen husat i dain pinis, Sir Ebia Olewale.  
Foto: Aja Potabe

## Hawa kalabus bai redi klostu taim

Aja Potabe i raitim

HAWA haus kalabus long Tari, Hela Provins bai redi long kisim ol kalabus manmeri taim em i gat banis waia, wara saplai na pawa lain long pulim pawa i kam insait.

Komanding Opisa bilong Hawa haus kalabus, Suprintenden Jim Kamin i tok ol arapela samting bilong Hawa haus kalabus i stap gut tasol wara saplai, banis waia na pawa saplai tasol i no stap.

"Dispela i stopim mipela long opim haus kalabus na larim ol kalabus manmeri i kam stap insait long banis," Mista Kamin i tok.

Em i tok Hawa i gat 5-pela woda man i stap. Ol i lukautim ol samting bilong haus kalabus na stap long Hawa long helpim Hela Provinsal Gavman i kirapim gen dispela haus kalabus.

"Mipela i stap long Tari wantaim ol pipel na ol komyuniti long sapotim ol wok long kirapim gen dispela haus kalabus.

"Mi laikim Hela mas gat haus kalabus bilong em yet bikos Hela em i nupela provins na haus kalabus i ken daunim ol asua bilong lo na oda," Mista Kamin i tok.

Em i tok kampani AM Holdings i mekim pinis ol mentenens wok long kirapim gen haus kalabus.

"AM Holdings i kirapim pinis sampela nupela haus we ol kalabus man bai stap. Em i mekim pinis sampela mentenens wok na mi amamas long gutpela wok AM Holdings i mekim," Mista Kamin i tok.

Em i tok ol trabel long Hela i go antap stret na ol Koreksenel Sevis (CS) wokman i wok long helpim provinsal gavman long opim gen Hawa long daunim dispela hevi.

Mista Kamin i tok tenkyu long Hela Provinsal Edministreta William Bando long sapot na helpim em i save givim long ol CS wokman long Hawa.

Em i tok tenkyu tu long Hela Gavana Anderson Agiru na arapela 3-pela open memba bilong Hela.

Em i tok tenkyu tu long ol pipel bilong Hawa, Halongali na Tagali LLG long sapotim wok bilong em long kirapim gen Hawa haus kalabus.

"Mi laik tok tenkyu long ol pipel. Ol i sapotim mipela na mi laik tok tenkyu long ol lida bilong Hela tu," Mista Kamin i tok.

Minsta Kamin i mekim dispela toktok long Pot Mosbi we em i bin kam stap tupela wik long mekim wanpela trening kos bilong ol senia opisa.

## Ren bai i kam bihain long tupela wik— Maiha

Esther Bralyn Wani i raitim

LONGPELA drai sisen long Papua Niugini i lukim ren pinis long sampela provins tasol sampela hap i no lukim ren yet.

Dairekta bilong Nesenel Weta Sevis (NWS), Samuel Maiha i tok, "Bai yumi lukim ren gen insait long tupela wik long wanem nau mipela stap insait long mun bilong drai sisen."

Mista Maiha i tok ol hap olsem Pot Mosbi, sauten hap bilong Westen provins, Sentral provins, Noten provins na Milen Be provins i no lukim ren yet tasol olgeta hap i lukim ren pinis.

Long dispela, Mista Maiha i tok bai yumi gat nomal ren i pundaun bihain long tupela wik.

Tis the season to be jolly, What have you planned for this season? **Family feasts, Gifts, Travel Expenses?** Make this **season** merrier with a

# BSP PERSONAL LOAN

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval

320 1212 / 7030 1212 - 24/7  
servicebsp@bsp.com.pg  
www.bsp.com.pg

# PNGCS sinia opisa kisim trening

**Aja Potabe i raitim**  
**TAIM sampela ami na polisman long Pot Mosbi i bin pait egen-sim ol yet long 3-Mail las wik, ol senia opisa bilong PNG Korek-senal Sevis (CS) i bin pinisim wanpela trening program long strongim disiplin long wokples.**

long dispela trening program.  
 Long dispela 15, 2-pela i bin meri.  
 Ol i bin amamas long greduet na kisim setifiket bilong ol las wik Fraide long Pot Mosbi.  
 Hughes Milen bilong Abby Consulting Limited i bin givim dispela trening long ol.  
 Mista Mileng i tok dispela trening program i bin luksave long ol pawa na blesing Papa God i save givim ol wan wan man.  
 "Yupela i save mekim gutpela wok tru long senisim ol nogut man i kamap gutpela man. Long mekim dispela wok, God i givim pawa long yupela na dispela pawa i stap pinis wantaim yupela.  
 "Mi bin ranim dispela trening program long onim lait long soim yupela dispela pawa we God i bin givim yupela long taim pinis,"Mista

Milen i tok.  
 Em i bin ranim dispela trening program long tupela wik long Pot Mosbi.  
 Ekting Komisina bilong PNGCS, Dennis Piandi i tok em amamas stret long lukim ol senia opisa bilong CS i kisim trening long mekim gut wok bilong ol.  
 "Taim yupela i skelim gut na glasim gut yupela yet, yupela bai luksave gut long yupela yet. Yupela i yusim dispela kain save tu long glasim gut ol kalabus manmeri na helpim ol long senisim pasin nogut na helpim ol long mekim gutpela pasin,"Mista Piandi i tok.  
 Em i tok PNGCS i gat gutpela stendet bilong disiplin na dispela trening program bai larim CS i gat moa disiplin long mekim gut wok rihebilitesen long olgeta haus kalabus long

PNG.  
 Komanding Opisa Bomana CS Trening Kolis, Bernard Nepo i bin amamas stret olsem dispela trening program bai helpim ol senia opisa bilong CS long helpim gavman i kirapim ol stratejik plen bilong muvim dispela CS i go het long nupela level.  
 "Mi tok tenkyu long Mista Mileng. Yu tru tru poroman bilong mipela na mipela i redi long bihainim dispela trening na mekim gut ol wok bilong mipela,"Mista Nepo i tok.  
 Em i tok dispela ol nupela save Mista Milen i bin givim ol senia opisa, bai kirapim stendet bilong lidasip na promotim disiplin na gutpela wok rihebilitesen long olgeta haus kalabus insait long PNG.




Mista Mileng i kisim wanpela presen i kam long wanpela senia CS opisa husat i bin pinisim trening program.



(Lephan) Mista Piandi, Mista Nepo, Mista Mileng, Misis Mileng, pikinini man bilong Mileng, na Suprintenden David Suagu.



Tupela meri wantaim ol senia CS opisa husat i bin pinisim trening program.



Nupela dabol bris...Ol konstraksen wokman i putim nupela dabol bris long Oro Bay-Kokoda Haiwe long Popondetta, Oro Provins. Dispela em i wanpela bilong 4-pela dabol bris gavman bilong Australia i bin fandim bihain long Saiklon Guba i bin bagarapim ples long yia 2007. Ol bai opim nupela rot na bris long neks yia, 2016. Foto: Nikints Tiptip



## Word Publishing Company Ltd

P. O. Box 1962, Boroko, NCD 111, PNG. Tel: (675) 325 2500 Fax: (675) 325 2579  
 Email: seovo@wantok.com.pg / word@wantok.com.pg

### Subscribe for your WANTOK Niuspepa now!!

All you have to do is fill in the form below and arrange for payment and we will dispatch your copy of the WANTOK to you each week. We publish the WANTOK 52 times a year.

AIRMAIL SUBSCRIPTION RATES (includes postage & handling)  
 PNG K220.00, Aus:ralia/New Zealand US\$ 10.00, Asia/Pacific US\$150.00  
 Rest of the World US\$210.00

**NCD HOME DELIVERY**  
 K0.80t per copy or K65.00 for two or more copies & Office pickup K52.00 per year for a copy.

Please send me \_\_\_\_\_ copy/copies of WANTOK for one year.

I enclose Kina/USD \_\_\_\_\_ as full payment.

Name \_\_\_\_\_

Postal Address \_\_\_\_\_

City \_\_\_\_\_

State/Province \_\_\_\_\_

(abbreviation)

Country \_\_\_\_\_ Zip/Postal Code \_\_\_\_\_

Street Address \_\_\_\_\_

Telephone \_\_\_\_\_ Fax \_\_\_\_\_

Email \_\_\_\_\_

Signed \_\_\_\_\_ Date \_\_\_\_\_

Publisher of



**WANTOK**  
 Niuspepa bilong Yumi ol PNG Stret

**Today**  
 Monthly English paper

# Nimamar TESS i op

Tony Sapan i ratim

PROGRAM bilong Nimamar LLG long Nu Ailan long helpim long baim kos bilong edukesen bilong ol pikinini Lihir i op pinis bilong givim helpim long 2016.

Dispela program em i bin stat long 2002 na i save helpim ol yanpela pipel bilong Lihir long baim kos bilong skul bilong ol na bai inap givim wankain helpim long 2016. Ol eplikesen i op pinis na bai i pas long 6 Desemba.

Ol sumatin i gat tingting long go skul long ol narapela skul long yia bihain na i laik kisim helpim i mas givim ripot long ol mak bilong ol na toksave i kam long wanem skul ol i bin go long en i go long Edukesen Sponsasip Opisa. Em bai helpim ol long pulumapim eplikesen fom long kisim helpim.

Palamentarian Seleksen Komiti bai husat sumatin i ken kisim helpim aninit long dispela program bihainim ol rul bilong em bihain long namba 6 Desemba.

Siaman bilong Edukesen bilong Nimamar LLG, Martin Zanayas i tok em bai i wok wantaim ol sumatin i wok long kisim helpim nau na husat bai i kisim helpim long 2016. I kam inap nau 5-pela sumatin husat i laik aplai long kisim helpim aninit long dispela program i kisim pinis ol eplikesen fom long aplai long dispela helpim.

# Ol volantia wet long kisim pe

Tony Sapan i raitim

PLANTI long ol volantia husait i bin helpim long tok kliia na givim aut marasin long pasim sik filaraisis long Lihir Ailan long mun Jun i wet yet long kisim pe.

I gat wari olsem mani long baim ol ol i paulim pinis long wanem foapela mun i lus pinis stat long taim ol i pinisim dispela wok na ol i wet yet long kisim pe.

Sampela komyuniti Helt woka long Mazuz Et pos insait long Wod 9 bilong Nimamar LLG i tok ol volantia em ol i baim ol pinis long dispela wok i kisim tasol K200 long K250 ol i bin promis long baim ol.

Ol i wari olsem ol volantia insait long narapela 9-pela wod bai i no inap kisim pe long dispela wok. Ol lida bilong 8-pela tim makim 8-pela et pos long ailan i kisim pinis K500 wan tasol 36 volantia bilong narapela 9-pela wod bilong LLG i no kisim yet pe bilong ol long dispela wok.

# OTML i givim K5 milien long Westen provins disasta rilif

OK Tedi Maining Limitet (OTML) i amamas long tok aut long K5 milien ol i givim long helpim long baim ol kaikai saplai bilong ol pipel long Westen provins.

Kampani i luksave long strongpela san we i bagarapim laip bilong ol pipel na ol i helpim long baim ol kaikai bilong ol.

Ol ejensi insait long Disasta Kodineta Komiti bai i skelim kaikai namel long ol pipel i kisim bagarap.

Menesing Dairekta na Sif Eksekutiv Opisa, Peter Graham i tok, 'Ok Tedi Maining i amamas long tokaut long dispela K5 milien long baim kaikai bilong ol pipel long Westen provins husat i kisim bagarap long strongpela san.'

'OTML na ol Westen provins komyuniti i save wok bung wantaim long kam taim bilong bikpela hevi na i gat ol hevi bilong mipela long ol operesen i stop bikos long strongpela san, mipela i amamas long helpim ol,' Mista Graham i tok. Ol narapela developmen patna na ol gavman ejensi bai i go het long givim mani na kaikai long dispela hevi long pipel bilong Westen provins.

# Juffa: Lukautim Girua maket gut

Aja Potabe i raitim

ORO Gavana Gary Juffa i tokim ol manmeri husat i save salim ol kaikai arere long Girua ples balus long Popondetta long noken tromoi pipia, klinim ples gut na tambu long salim bua na smuk.

Gavana Juffa i tok em bai pasim dispela liklik maket arere long banis bilong Girua ples balus sapos ol manmeri i no bihainim dispela tok lukaut bikos dispela hap graun em i graun bilong gavman na i no graun bilong ol manmeri Girua.

"Noken salim ol nogut samting olsem buai, daka na smuk bikos dispela ol samting bai no inap helpim laip bilong yumi.

"Mi les long lukim yupela i salim ol samting ol Saina i mekim,"Gavana Juffa i tok.

Mista Juffa i tok em i laikim ol man meri long salim ol gutpela samting olsem gaden kaikai we ol manmeri long ples yet i planim na Tapa klos we ol manmeri Oro yet i save mekim long ples.

"Girua ples balus bai kamap bikpela intenesenel ples balus. Planti ol turis bai kam lukim ol ples olsem Kokoda Trek we Wol Wo 2 i bin kamap.

"Mi les long Oro Provins i kisim nem nogut taim yupela i mekim ples i luk deti wantaim ol rabis na buai spet,"Mista Juffa i tok.

Em i givim tok lukaut long ol



Wanpela lapun mama i salim ol kumu long liklik maket ausait long Girua ples balus, Popondetta.

Poto: Aja Potabe

manmeri olsem em bai tokim ol polisman long rausim dispela liklik maket sapos ol i salim buai, daka, smuk, na ol samting Siana i mekim.

"Dispela i no hap graun bilong yupela. Em i graumn bilong Stet. Bai mi rausim dispela maket sapos yupela i no harim toktok na mekim nambaut long

laik bilong yupela yet,"Mista Juffa i tok.

Mista Juffa i salensim ol manmeri long kirapim gutpela senis long ples na stopim olupela pasin bilong salim buai, daka na smuk.

"Provins bilong yumi i wok long kirap. Buai, daka na smuk bai no inap karim yupela i go

long wanpela gutpela hap. Lusim buai, daka na smuk.

"Mekim sampela gutpela bisnis. Planim kaikai na salim long maket. Salim ol gutpela samting ol Tapa klos na dispela kain bisnis bai karim planti gutpela samting i kam insait long provins bilong yumi,"

Mista Juffa i tok.



# Ol laki Tembari pikinini

Sampela sumatin bilong Tembari De Kea Senta ausait long Mosbi ibin go lukluk raun long patrol sip, Triton long Pot Mosbi bris. Sip ya em i bilong Gardline, wanpela Marin Saiens kampani na em i bin raun i kam long Pot Mosbiu na PNG long las mun. Ol pikini i bin laki stret long raun i go lukluk raun long sip.

# Tolukuma papagraun les long 'K2 kampani'

Aja Potabe i raitim

**OL papagraun bilong Tolukuma Gol Main long Tapini, Sentral Provins i les long nupela kampani bilong Singapo, Asidokona Main-ing Riso PTE i kam insait na kisim ples bilong Petromin olsem opreta na papa bilong dispela namel sais gol main.**

Siaman bilong Auga Dilava Riso Asosiesen, Billy Aia i sapotim wanpela singaut we Minista bilong Woks, Francis Awesa i bin mekim.

Minista Awesa i bin mekim wanpela singaut i go long gavman long noken givim ol kontrak long ol liklik '2 Kina' kampani we i no gat eksprens long mekim wok.

Mista Aia, husat i makim maus bilong ol pipel na papagraun bilong Goilala, Kuni na

Mekeo i tok Asidokona Main-ing Riso PTE i luk olsem wanpela 'K2 kampani' bikos em i nogat eksprens long ranim mainin projek.

Em i tok gavman na Petromin i no bin toksave gut long ol papagraun na pipel bilong PNG taim ol i laik salim Tolukuma.

"Gavman o Petromin inap long toksave gut long mipela ol papagraun. Ol inap long toksave long ol pipel bilong dispela kantri tu. Tasol ol i no bin mekim ples klia," Mista Aia i tok.

Em i tok Siaman bilong Petromin, Sir Brown Bai i no bin tokaut klia long dispela nupela kampani.

Tasol Sir Brown i tok Petromin i bin wokbung wantaim Sentral Provinsal gavman long salim Tolukuma gol maining.

Sir Brown i mekim dispela toktok long kliarim tingting bilong ol papagraun na sampela lida bilong Sentral Provins.

Sir Brown i tok disisen bilong salim Tolukuma gol maining i no bin kam long maus bilong wanpela o tupela man tasol.

"Ol bod ov dairekta bilong Petromin na Tolukuma gol maining i bin sindaun long miting na kamapim dispela disisen. Na mipela i bin toktok wantaim ol maus man bilong Sentral provins tu wantaim," Sir Brown i tok.

Tasol sampela ol lida bilong Sentral Provins i tok Petromin i no bin toksave gut long ol taim em i laik salim Tolukuma.

Membra bilong Kairuku-Hiri, Peter Isoaimo i bin tokim Palamen long mun Oktoba olsem ol pipel bilong em i no

save long wanem samting i wok long kamap long Tolukuma.

Sentral Gavana Kila Haoda tu i bin paul taim em i bin lukim long niuspepa olsem nupela kampani husat i gat Motu nem 'Asidokona' bai kamap nupela ona na opereta bilong Tolukuma gol main.

Sir Brown i tok ol opisal bilong Sentral Provinsal gavman na bod bilong Tolukuma gol main na bod bilong Petromin i bin bungim tingting wantaim, ol i bin wanbel na salim dispela namel sais gol main i go long Asidokona bikos;

Asidokona i wanbel long givim 10 pesen fri-keri ekwiti long ol papagraun bilong Tolukuma

na Asidokona i bin wanbel long kirapim nupela haiwe rot long Tolukuma i kam olgeta long Mekeo na joinim Hiritani haiwe.

# Famili na seksual vailens i save bagarapim laip

Esther Bralyn Wani i raitim

"FAMILI na seksual vailens i save bagarapim laip. Em i save putim bikpela mak na bagarap long ol pikinini, na stopim gro bilong ol long kamap ol gutpela ol manmeri long bihain.

Em i save stopim ol long kamap pipel long inapim laip bilong ol na daunim ikononik developmen," Ekting Deputi Seketeri bilong Dipatmen bilong Jastis na Atoni Jenerel, Roselyn Gwaibo, i makim maus bilong Seketeri Lawrence Kalinoe i tok.

Mis Gwaibo i tok long planti rot, famili na seksual vailens i holim bek PNG long go het olsem kantri. Em i tok mipela olgeta i mas traim long stopim dispela vailens i go bikpela yet.

'Long dispela, gavman na ol non gavman oge-naisesen i ken wok bung na mekim wok bilong ol long stopim vailens,' Mis Gwaibo i tok.

Em i tok senisim kalsa na pasin bilong ol pipel i no wanpela isipela samting. Tasol em i wanpela bikpela samting long stretim dispela hevi aninit long lo.

'Wanpela bikpela samting long wok em long konektim ol sevaiva bilong famili na seksual vailens wantaim planti ol sevis we ol i nidim,' Mis Gwaibo i tok.

Em i tok dispela ol riferel gaidlain we ol i opim las wik Fraide em wanpela bikpela developmen long helpim wantaim dispela.

Dispela gaidlain i gat ol gutpela toktok long helpim ol sevaiva wantaim ol kain ol sevis na wanem ol i laikim.

Long wankain taim, Seketeri Kalinoe i laikim bai ol i kamapim dispela wok bilong FSVAC long provinsal level long helpim ol sevaiva long graun.

Em i amamas long wok bung namel long FSVAC na lo na jastis program bilong gavman bilong Australia.

Em i tok gavman bilong PNG tu i laik daunim dispela pasin. Long wanem Famili Proteksen Ekt i kamap long 2014 tasol ol regulesen aninit long dispela Ekt i stap long kabinet long givim tok orait.

Long nau yet, ol distrik kot i save givim interim proteksen oda long lukautim ol sevaiva bilong domestik vailens.

# Buka komyuniti noken pret long polis

POLISMAN i tok ol pablik long Buka long Atonomas Rijen bilong Bogenvil i mas no ken pret long polis na toktok gut wantaim ol olsem poro bilong ol.

Provinsal Polis Komanda na Sif Inspekta bilong Is Sepik, Peter Philip, i givim dispela toktok long pablik long las wik Trinde apinun, taim wanpela grup bilong ol senia opisa long Sauten na Boda Koman i go lukim Hahela Praimeri skul long Buka.

PPC Philip i tokim ol sumatin na ol tisa long Hahela Praimeri Skul long tokim ol famili na poro bilong ol long bungim ol polis olsem pren bilong ol na i no ken pret long ol.

Na tu, em i tokim ol tisa na ol papamama husat i bin stap long dispela bung olsem, "Yupela noken skulim

ol pikinini long pret long ol polis taim ol i stap pikinini yet."

"Polis man na meri i no birua bilong yupela, em ol pren bilong yupela," Philip i tok.

Philip i toktok tu olsem, Famili Seksuel Vailens (FSV) na Rot Sefti em tupela ki samting na nid long toktok gut insait long komyuniti, bikos namba bilong famili vailens na rot eksiden i kamap bikpela long Buka na olgeta hap long PNG.

Taim ol i ran i go long dispela skul, ol senia polis opisa i mekim presentesen long ol gif o presen olsem eski, spot bal, tent na volibal net i go long skul.

Hahela Praimeri Skul em i wanpela skul long Buka i gat bikpela namba bilong sumatin insait long Buka na PNG tu.



Provinsal Polis Komanda (PPC) bilong Is Sepik Provins na Sif Inspekta, Peter Philip, i toktok long taim ol i visitim Hahela Praimeri Skul long Buka.



Piksa i soim, ol polis i givim ol presentesen ov gif i go long Hahela Praimeri Skul.



Ol sumatin bilong Hahela Praimeri Skul i sindaun isi na harim ol toktok bilong ol bikman na polis taim ol i bung.

**ATONOMAS Rijen bilong Bogenvil gavman i lonsim plen bilong skruim lo na jastis insait long 4-pela yia i kam. Dispela piksa i soim olsem Polis, Koreksenel Sevis na Jastis i stap bung wantaim na i mekim pis agrimen long larim pis i ken i stap long Bogenvil komyuniti.**



Mis Roselyn Gwaibo i holim riferel patwe gaidlain buk we em i makim Siaman bilong FSVAC, Seketeri Lawrence Kalinoe na opim.

# EARN LOYALTY POINTS EVERY TIME YOU SHOP OR BOOK WITH OUR CORPORATE PARTNERS!



**Air Niugini**  
www.airniugini.com.pg

For more information call us on (675) 327 3335  
or email: destinations@airniugini.com.pg

Like us: Destinations Air Niugini

## Hailans ministri grup visit long Pot Mosbi



**WANPELA Gospel sing grup bilong Isten Hailans, Hambel Preis Singing Ministri i bin go long Pot Mosbi long namba wan taim gospel autris program raun bilong ol long siti.**

Grup i gat 11-pela singa na 8-pela sapot memba. Ol i go long siti na i wok long singsing long SDA sios na sampela narapela pablik ples inap long tupela wik long kamapim mani long wokim haus lotu bilong ol long ples.

Ol i laik autim tok bilong God na long singsing insait long siti na husat lain i harim bai i ken senisim laip.

Grup i askim olgeta lain long bung wantaim ol gospel ministri na bai ol i ken lukim kliia ol hevi bilong graun na senisim laip long stap gut.

Em i namba wan gospel singing ministri grup long kamaut long Isten Hailans Provins na yusim musik instramen long painim mani. Hambel Preis i wanpela biknem gospel ben long Isten Hailans. na long Mendi taun grup i bin stap insait long Rijonal Baibel komprens long Jun dispela yia.

Ol i tingting long soim stail bilong ol na bringim singing ministri bilong ol i go long narapela mak insait long Pasifik.

Nem bilong grup "Hambel" em ol i kisim long makim pasin bilong ol pipel bilong ples bilong ol Fagonofi long daunim ol yet long taim bilong ol traibel pait moa long 25 yia i go pinis wantaim ol ples klostu.

Ol pipel bilong dispela ples i save daunim ol yet tru na holim pasin

Ol poto: Hambel Preis Singing Ministri grup.



Kristen strong long taim pait i bin stap wantaim ol lain birua. Ol pablik sevis olsem skul, rot na ol liklik bisnis (SME) i bin bagarap long taim bilong pait, tasol ol i bin daunim ol dispela hevi na tingting strong long ples bai kamap gutpela gen.

Hambel Preis i kamap long 1996 - 2006 long Fagonofi SDA Sios Pathfinder kwaia grup long Henganofi distrik. Long dispela taim i kam ol memba bilong grup i bel kirap long musik, na tupela memba bilong grup, Misek

A'aron na Kups Nareo i go kisim musik klas long Goroka Lutheran sios.

Ol i wok long traim yet long kamapim grup taim elda bilong sios na minista Jepheth Hevare i kam insait long grup na helpim ol long 2014. Minista Jepheth i bin lukim ol yangpela singa i gat bikipela laik long singsing olsem na em i bin kam insait long helpim ol.

Taim Hambel Preis i bin kamap long yia 2014 wantaim helpim bilong ol ples lain bilong ples

Fagonofi olsem sponsa bilong ol, lokal Memba bilong Palamen, na Minista bilong Polis, Robert Atiyafa helpim ol wantaim ol narapela sponsa na ol pren bilong ol.

Ol i lonsim Hambel Preis ministri long 12 Septemba 2014 long Henganofi stesin we planti lain i bin go na witesim.

Namba wan song ol i bin rekodim na kisim vidio bilong en i bin kamap long Fagonofi ples na long ol hap klostu.

Pasifik Edventis Yunivesiti Midia

Yunit i bin rekodim long 2014. Ol i salim pinis 700 DVD vidio klis na ol i redi long salim moa nan au ol i gat 300 DVD tasol i stap long salim.

Vidio bilong grup i save kamap long Kundu 2 (NBC Nius) na DVD albam i stap long ol SDA na EBC Kristen Buk Stua long olgeta hap bilong kantri.

Planti song bilong ol em ol grup yet i komposim long tokples Kafe bilong Isten Hailans yet.

Ol i stat long redi nau long wokim namba tu rekot long neks yia.

# Soldia i atekim ol polis

**WANPELA** man i dai taim wanpela soldia na wanpela meri i bin kisim bagarap bihain long ol polis i bin ranim ol insait long wanpela kar long long Pot Mosbi long las wik Fonde nait.

Belhat long dispela birua pasin i bin kamap, ol soldia i bin go long Boroka Polis Stesen long wankain taim na i toktok strong long ol

polisman i stap long wok long stesen.

Ol soldia i bin bagarapim wanpela polis kar i bin sanap stap long polis stesen, na i tokim ol long mekim wok painimaut kwik taim long i gat wanpela dai i kamap na 3-pela lain i kisim bagarap taim ol polis i sutaut.

Bihain long ol soldia i bin toktok wantaim ol polisman, ol i bin go

long Manu Auto Pot fiul stesen long Fraide moning na paitim tupela polisman na bagarapim tupela polis kar. Tupela polisman i bin stap long fiul stesen long kontrolim NCD polis kar i laik putim fiul na ol soldia i bin kam long tupela kar na i paitim tupela.

Wanpela polisman i tok, em i bin abrusim wanpela tamiok we wanpela soldia i bin tro-

moi antap long em na i ran i go long bikpela rot we wanpela kar i bin sevim em. Metropolitan Komanda bilong NCD, Benjamin Turi, i tok ol polis long Hohola i ranim wanpela kar we em i ran long hai spid na draiva i no stop taim ol polis i tokim em long stop.

Ol i bin ronim dispela kar i kam olsem long Tokarara na Not

Waigani na i kam bam long bikpela trafik jem i kamap arere long Waigani Paia Stesen.

Turi i tok, "Mi bai no inap mekim moa toktok bikos wanem samting i kamap bihain long kar i bam em samting bilong ol polis long painimaut."

"Soldia na meri i bin kam wantaim em ol bai stap long han bilong polis inap wok painimaut bai pinis.

# Tabar opim nupela buksop



**Minista bilong Haia Edukesen na Risets Sains, Malakai Tabar na Vais Sensela bilong Yunivesiti bilong Papua Niugini, Albert Mellam i opim nupela buksop.**

## Esther Bralyn Wani i raitim

MINISTA bilong Haia Edukesen na Risets Sains, Malakai Tabar, i opim nupela buksop long Yunivesiti bilong Papua Niugini (UPNG) long las wik Fraide.

Dispela em hap bilong Buk2buk program we olgeta UPNG i wokim nupela buksop bilong ol praimer i inap sekenderi skul na olpela buksop bai gat ol buk bilong ol bikpela institusen.

Minista Tabar i tok, 'Yumi mas soim ol yangpela pipel olsem yumi ken raitim ol buk na ol i ken bihainim.'

Em i tok ol kompyuta na ol nupela teknoloji i paulim tingting bilong ol sumatin. Em i givim wanpela piksa we ol sumatin i kisim piksa long ol homework bilong ol o ol wok long teks buk. Dispela i mekim na ol i no bisi long ritim o lukim na ol i no wokim gut long skul bilong ol.

Long wankain taim, Vais Sensela bilong UPNG, Albert Mellam i tok tenkyu long Minista Tabar long givim yunivesiti dispela hap we ol i save abrusim.

Vais Sensela Mellam i amamas long dispela salens i kamap long bikpela skul olsem UPNG.

Long pinis bilong dispela bung, Mary Mennis i givim buk bilong en 'Hagen Saga' long Minista Tabar na Profesa Steven Winduo tu i givim sampela olpela buk bilong en long Minista tu.

## Bogenvil i lonsim lo na jastis plen

ATONOMAS Rijon bilong Bogenvil gavman i lonsim plen bilong skruim lo na jastis insait long 4-pela yia i kam.

Ol i bin lonsim Mid Tem Dvelopmen plen (MTDP) long Buka long Novemba 11 na i tok olsem lo na jastis i mas wok aninit long wokfos, sistem na infrastraksa bilong ol.

Bogenvil Lo na Jastis Woking Grup i bin mekim dispela plen wantaim ol mausman bilong Bogenvil na Nesenel ejensi na komyuniti grup.

Gavman bilong Australia tu i sapatim aninit long PNG- Australia Lo na Jastis Patnasip- Trensisen Program (PALJP-TP).

Minista bilong Polis, Koreksenal Sevis na Jastis, Willie Masiu, i tok, "Dispela em bilong komitmen bilong ol pipel bilong yumi na em bai lukautim ol pipel gut tru. Mi lonsim dispela plen na putim i go bek long han bilong ol mausman bilong ol pipel long wok gut na kirapim lo na jastis sevis insait long Buka."

Sekretrei bilong Polis, Koreksenal Sevis na Jastis, na Siaman bilong Lo na Jastis Woking Grup, Kearneth Nanei, i kodinetim dispela plen na i tok MTDP em i gutpela tingting bilong pis bai stap long Buka.

"Woking Grup em long redim gutpela lo na jastis sevis bilong ol pipel long Buka. Plen i mekim na tingting bilong mipela i karim kaikai na Bogenvil Pis Agri-men i kamap long strongim lo na jastis institusen long Bogenvil na em bai lukautim lo na jastis sevis inap yia 2019," Nanei i tok.

Minista bilong Australia Hai Komisn, Rod Hilton, i tok MTDP em i mak bilong strongim patnasip namel long Gavman bilong Bogenvil, Papua Niugini na Australia.

"Plen bilong mipela em long impruvim o kamapim gut na skruim sevis i save strongim pis, jastis na sekyuriti long Bogenvil. MTDP em i kamap long plen bilong mipela. Australia gavman i amamas long sapatim ol sampela tingting ol i save kamapim we gavman na ol pipel i save wok bung wantaim long kamapim namba wan sosaiti," Hilton i tok.

# It's time to fly with your NEW Airline



People connecting People.

We can assure you that we'll stay true to our promise, that you'll receive the warmest welcome everytime with PNG Air.



# PNG Air



# SIGN UP TODAY AND EARN 2,000 LOYALTY POINTS!

Register online at [www.destinations.com.pg](http://www.destinations.com.pg)

Destinations Loyalty Program 'membership has its privileges'.  
Get access to exclusive member specials once registered. Offer valid until 31st December 2015.



**Air Niugini**  
[www.airniugini.com.pg](http://www.airniugini.com.pg)



For more information call us on (675)327 3335  
or email: [destinations@airniugini.com.pg](mailto:destinations@airniugini.com.pg)

Like us: Destinations Air Niugini

## Tabar i salensim ol yangpela long kamap raita

Esther Bralyn Wani  
i raitim

'Yumi mas groim ol neks jeneresen o ol yangpela long kamap ol raita. Yu no nid long lukluk longwe long kisim ol skul toktok.

Yumi gat ol raita namel long yumi, sampela bikpela raita bilong Papua Niugini husat i bin helpim long senisim PNG long independens na go het long mekim ol stail i go long wol bilong litresa na musik,' Minista bilong Haia Edukesen na Riset Sains, Malakai Tabar, i tok.

Em i mekim dispela toktok long Buk2buk konpres bilong Yunivesiti bilong Papua Niugini (UPNG) long makim 50 yia bilong yunivesiti. Ol narapela raita insait long PNG na ol ovasis raita husat i save raitim buk bilong PNG tu i bin stap insait long dispela bung long las wik Fraide.

Minista Tabar i tok, 'Mi laikim ol neks jeneresen bilong ol raita long bihainim ol lek mak bilong husat i go pas na go het long raitim

stori bilong yumi.'

Long wankain taim, em i amamas long Dokta John Evans long opim sampela nupela buk insait long UPNG Pres na long mekim UPNG Buksop wanpela bilong ol namba wan ples long kantri na wol tu.

'Mi luksave long ol salens we ol buksop na ol raita i lukim insait long dispela kompiuta wol tasol mi save olsem bai yumi kirap long ol salens taim yumi i inap long stap insait long dispela moden wol we ICT i gat bikpela han mak,' Minista Tabar i tok.

Em i amamas tu long ol raita olsem Sif Kasaip-walova, Norah Vagi Brash (long ol drama), Russel Soaba, Profesa Steven Winduo, Dokta Don Niles, Jonathan Ritchie na leit Otto Nekitel we wok bilong ol i kisim intanesenel luksave.

Minista Tabar i harim olsem drama bilong Nora Vagi Brash i biknem drama long Rusia na buk bilong Russel Soaba ol i save yusim olsem teks buk bilong literesa long ovasis.



Ol pipel i stap insait long dispela Buk2buk bung.

## Kaugere Pramer i opim nupela klasrum

KAUGERE prameri skul insait long Nesanel Kapit-el Distrik i opim ol nupela toilet, opis bilong ol tisa na ol klasrum long Tunde long dispela wik.

Minista bilong Spots na Ivents, Justin Tkatchenko wantaim Namba wan Seketeri bilong Edukesen, Kate Fuller, i bin stap long dispela taim.

'Gutpela helt, ol gutpela fasiliti na gutpela infrastraksa i impoten long kamapim gutpela autkam. Mi no gat tupela tingting olsem gutpela fasiliti olsem ol nupela klasrum na ol nupela toilet bai i mekim ol pikinini i laik go skul olgeta taim,' Mis Fuller i tok.

Em i tok ol dispela sumatin i skul long Kaugere bai i kamap



Nupela klasrum long Kaugere Pramer i skul Australia i bin givim mani long wokim.

komyuniti lida long tumora. Em i tok sapos komyuniti i laik kamap gut long ikonmik na gutpela sindaun, em i nidim ol pipel wantaim rait ek-spiriens na rait edukesen.

Mis Fuller i tok, 'Ol nupela infrastraksa bai i no inap kamap sapos i no gat sapat long komyuniti na wok bung wantaim ol tisa, ol sumatin na ol famili bilong ol sumatin.

Em i tok long kain wok bung wantaim gavman bilong PNG na ol pipel long Australia i redi long sapatim ol lokal komyuniti olsem Kaugere.

## Ol 7-pela loya i givim buk long ol skul

Esther Bralyn Wani  
i raitim

OL 7-pela yangpela loya meri i kamap wantaim tingting long givim bek long ol komyuniti we ol i laik lukim planti pikinini i laik ritim buk.

Ol i pinis long Yunivesiti bilong Papua Niugini (UPNG) long lo skul na ol laik lukim ol liklik pikinini i kisim pasin bilong ritim buk bilong helpim ol long bihain taim.

Ol meri em Eunice Parua, Stephanie Alo-pea, Amanda White, Michelle Pint, Phillomina Nagari, Eva Tekwie Ortauf na Lisa-marie Tepu.

Ol i statim dispela buk projek bikos ol i lukim olsem planti pikinini i stap long elementeri i no inap long ritim ol buk. Ol i laikim ol dispela yangpela pikinini long rit na yusim tingting bilong ol na tingting ausait long viles bilong ol.

Ol bai go long Hagen long Desemba 17 na bai ol i givim ol buk long namba wan skul long Piltange Pramer i skul long Ji-waka provins na Kou Elementeri skul insait long lalibu long Sauten Hailans provins.

Ol i makim dispela tupela skul bikos skul i stap long ples bilong Stephanie na Amanda we i ken isi long ol long transpot na hap bilong

slip. Long wanem, ol yet i go pas long strettim ol balus tiket na ol narapela samting.

Long wankain taim, tupela bikpela dona bilong ol i kam long UPNG Buksop na Buk bilong Pikinini. Tasol, ol wan wan lain wantaim sampela famili i givim sampela ol buk na mani long sapatim dispela projek.

Ol i statim dispela buk draiv long stat bilong dispela yia taim ol i tingting long bungim buk bilong ol pikinini. Ol i bin statim namba wan buk draiv bilong ol long Me 23 na ol i bungim 100 buk. Namba tu buk draiv bilong ol i bin kamap long Oktoba 31 na ol i bungim 50 buk.

# Australia sapotim pait bilong HIV/AIDS long PNG

TUNDE long dispela wik em i Wol AIDS Dei na Australia, wanpela bikpela kantri bilong helpim PNG long wok bilong daunim HIV/AIDS i mekim tok promisen long sapotim wok bilong HIV/AIDS rispons long Papua Niugini.

I bin gat wanpela nesanel HIV ekspo long promotim wok bilong stopim binatang bilong HIV na long givim marasin long ol lain husat i gat sik pinis insait long Sir John Guise Stadium long Pot Mosbi.

Eking Australia Hai Komisina long PNG, Bronte Moules i bin tok-tok long dispela ekspo pait bilong HIV na ol arapela komyunikebel disis i stap namba wan long Australia eid program.

"Gutpela helt wantaim edukesen na jenda ikwaliti em i namba wan long strongim wanpela wokfos i gat save na long liptimapim standet bilong ol Papua Niugini pipel," Mis Moules i tok.

"Papua Niugini Gavman i mas kisim gutpela toktok long mekim gutpela wok long givim ol entirivairael tritmen nating long ol lain husat i nidim.

"Nau mak bilong HIV long kantri i go daun, tasol i gat ol pipel husat inap long kisim dispela binatang isi



Ol lain bilong ol lokal NGO i kamap long luksave long HIV ekspo.

i stap yet long birua bilong kisim sik. Ol dispela pipel i nidim yet moa luksave na helpim long stopim na long kisim tes long sekim binatang.

"Mipela i gat strongpela tingting long sapotim wokbung bilong PNG

helt sekta na sivel sosaiti patna olsem Katolik HIV/AIDS Sevis na Clinton Helt Akses Inisativ, na tu long bikpela wok bilong ol arapela ogenaisesen olsem susu Mamas. Susu Mamas, i bin mekim moa



Eking Australia Hai Komisina long PNG Bronte Moules i toktok long Wol AIDS De.

sevis long stopim sik long kalap long mama i go long pikinini."

Australia i save givim moa long K40 milien long wok bilong nesanel HIV long PNG.

Long las yia sapot bilong Aus-

tralia i helpim 78,000 pipel long kisim tes, kaunseling bilong 7500 pipel na HIV tes long moa long 43,000 meri na helpim 2 milien man na meri long we bilong lukautim ol yet.

## Putim mani hariap long pinisim sik AIDS

SEKETERI Jeneral bilong Yunaitet Nesens (UN) Ban Ki-Moon i tok dispela yia i gat nupela tingting bilong Wol AIDS De.

Mista Ban Ki-Moon i amamas long ol strongpela lain bilong edvokasi long sanap strong, na tu, long strongpela wok bilong ol helt wokman na meri wantaim ol strongpela lain i sanap baksait long ol human rait long long strongpela tingting bilong olgeta lain husat i bungim han long pait long pinisim sik AIDS long wol.

Ol wol lida i wanbel olgeta na pasim tok long pinisim AIDS epidemik taim yia 2030 i kamap, na em olsem hap bilong strongim Sastenebel Di-velopmen Gol ol i kisim long mun Septemba. Dispela komitmen i soim pasin bilong bungim han na sanap strong wantaim, long daunim wanpela kain sik no gut bilong bagarapim pipel. Em i wanpela bikpela kain wok bung insait long histori bilong tude.

"I gat planti samting yumi bai lainim long kain wok bilong daunim sik AIDS. Wan wan pipel i wok long sanap long nem bilong saiens, human rait na long strongim ol lain husat i stap wantaim binatang bilong HIV. "Sans dua bilong mekim wok i laik pas nau. Olsem na mi wok long



singaut long mas hariap long putim moa invesmen pastaim na pasim baret namel long ol nid na ol sevis.

Long brukim rot bilong dispela bikpela sik na long stopim em long em long kisim ol gen, yumi mas mekim wok i go pas.

"Yumi mas dabolim namba bilong ol pipel long kisim marasin bilong stap i go long 37 milien bilong ol lain husat i stap wantaim HIV binatang. Yumi mas givim moa o skul long ol liklik pikinini meri na ol yangpela meri

na givim ol trupela samting bilong lukautim ol yet na ol i no ken kisim HIV. Na yumi mas givim ol ki populesen wantaim gutpela sevis wantaim gutpela tingting na rispek.

"Wan wan pikinini i no ken kisim HIV long ol mama bilong ol husat bai stap wantaim gutpela laip. Wok bilong pinisim AIDS long wol em i mas kamap long mekim olgeta wan wan meri na pikinini insait long wanpela jeneresen stap helti. "Sapos yumi hariap long kisim ol taget o mak em bai stopim nupela in-

fekesen na dai kamap long AIDS na HIV na long pinisim tru pasin bilong stigma na diskriminesen.

Mi lukluk long 2016 miting bilong Jeneral Asembli bilong AIDS olsem gutpela sans long wol long bringim taim bilong pinsim AIDS i kam hariap.

Long dispela Wol AIDS Dei, yumi tingim olgeta lain husat i lusim laip wantaim dispela sik wantaim tingting bilong sanap long stretpela pasin jastis, na long kisim sevis bilong hop raun long wol," Mista Ban K-Moon i tok.

## MDR TB long Daru i stap yet

GAVMAN bilong PNG i gat plen bilong daunim sik MDR-TB long Daru, Westen Provins na dispela i bin kamap ples klia long taim ol patna i bin bung long las wik long Pot Mosbi.

PNG Nesanel Dipatmen bilong Helt, Wol Helt Ogenaisesen, Australia Gavman, Wol Vision na ol narapela patna i bin bung long las wik Trinde long toktok long mekim moa wok long bringim sevis i go long Daru Ailan, Westen Provins we ol i painim planti moa pipel i gat sik MDR TB.

PNG Gavman na ol patna i bin luksave pinis olsem sik TB long Westen Provins em i kamap bikpela hevi bilong helt, bilong wanem namba bilong ol siklain em i bikpela tru long olgeta distrik. Klostu 1 pesen bilong populesen long Westen Provins i save kisim sik TB long wan wan yia.

Long 2012 i kam, moa wok long TB i kamap long Westen Provins na dispela i soim olsem i gat moa pipel i gat TB i stap yet. Sampela em ol lain we i no kisim gut marasin long pastaim

na nau ol i kamapim narapela kain TB ol i kolim DR-TB long Saut Flai Distrik. Mak bilong dispela sik i kalap long wanpela sikman o sikmeri i go long narapela em i wok long go antap yet.

Ol patna i tok em i tru olsem wok bilong daunim sik TB long Westen Provins em i wanpela kain helt salens long wol wantaim wanpela kain helt sistem we i gat hevi long en.

Tasol taim olgeta lain i putim han na tingting long helpim wok, ol i lukim sampela gutpela senis i kamap.

PNG na Westen Provins Edministresen i go pas long dispela pait na olgeta patna i wanbel long helpim long karim aut ol plen bilong PNG gavman. Australia gavman i bin putim AUD\$44.7 milien long wok bilong TB long Westen Provins stat long yia 2011 na bai go moa yet long yia 2017.

Bikpela hevi em i stap yet na maski planti helpim i go pinis long sait bilong mani na marasin, PNG Nesanel Helt Dipatmen na Westen Provins

Edministresen i nidim yet moa helpim long go long provins. Ol patna i wanbel long dispela bung olsem gutpela plen wantaim mani na marasin inap long daunim TB long provins.

I gat strongpela kodinesen bilong ol intenesenel patna i stap long sapotim PNG lidasip long mekim wok bilong daunim sik TB.

Em i karamapim mani bilong kisim ol helt wokman na meri, kamapim ol gutpela ikwipmen bilong sekapan menesmen, givim ol marasin bilong TB, kamapim gut ol infrastraksa, transpot bilong sapotim mobail autris, gutpela komyuniti awenes, na trenim ol rurel komyuniti helt woka na ol volantia.

Dispela wok i helpim long luksave long planti moa sikman na meri husat i gat TB long Daru na long helpim ol long kisim gutpela helpim inap long mak bilong WHO intenesenel standet.

PNG na intenesenel patna i save moa long TB hevi long Westen Provins wantaim wok ol i mekim pinis.

# Rot bilong daunim vailens i op

Esther Bralyn Wani i raitim

**FAMILI na Seksual Vailens Eksen Komiti (FSVAC) i opim gaidlain long sapotim riferel na rot bilong ol sevis long ol sevaiva o ol lain i kisim hevi long famili na seksual vailens long las wik Fraide.**

Ekting Deputi Seketeri bilong Dipatmen bilong Jastis na Atoni Jenerel, (DJAG) Roselyn Gwaibo, i makim Seketeri bilong DJAG, Lawrence Kalinoe long opim

dispela riferel gaidlain.

Dispela riferel gaidlain i kamap long wok bung bilong FSVAC wantaim sapot bilong gavman bilong Australia. Ol patna em olsem ol gavman ejensi, ol pipel i makim lo na jastis, non gavman, ol sios na ol praivet sekta.

Nesanel Kodineta bilong FSVAC, Ume Wainetti i tok, 'Yumi i bin traim long kamapim dispela gaidlain insait long 5-pela yia long bungim ol wok. Em i wanpela gaid bilong yumi olgeta,

namel long ol sevaiva na ol pipel i save givim sevis,' Mis Wainetti i tok.

Mis Wainetti i tok ol i redi long sapotim dispela gaidlain na strongim ol wok bung na developim. Em i tok ol i laik luksave long ol sampela salens we ol pipel i save givim sevis i save lukim.

Long wankain taim, Kaunsela bilong Australia Hai Komisina, Susan Ferguson, i amamas long FSVAC long kamapim dispela gaidlain long sapotim ol sevaiva na

stopim vailens.

'Bikpela samting em long bungim ol pati na helpim ol meri, pikinini, na sampela man husat i save kisim bagarap long vailens sapos dispela rot i klia,' Mis Ferguson i tok.

Em i tok wanpela as we gavman bilong Australia i luksave long dispela em bikos ol meri i save go het long developmen na ol meri i ken givim strong long kantri.

Em i tok vailens i save stopim developmen.



Raithan-Lephan; Eksekutiv Dairekta bilong Opis bilong Developmen, Gayle Tatsi, Kaunsela bilong Australia Hai Komisina, Susan Ferguson, Nesanel Kodineta bilong FSVAC, Ume Wainetti, Ekting Deputi Seketeri bilong Dipatmen bilong Jastis na Atoni Jenerel, Roselyn Gwaibo, na Sif Mejistret, Dessie Magaru.

## Ol meri i kisim skolasip



Lephan; Susan Edgecombe na Australia Awat PNG Fesileta, Peter Leahy wantaim ol sumatin i pinisim skul.

ENGA tisa kolis i selebretim greduesen bilong nupela 42 elementri tisa. Ol 10-pela sumatin em ol meri long Enga husat i kisim Australia Pasifik skolasip Awat.

Ol 10-pela meri i kisim save long kamap ol kwaliti elementri tisa long ol sumatin long ol distrik long Wabag, Wapenamanda, Kandep, Kopian na Laiagam.

Meri i makim Hai Komisina bilong Australia, Suzanne Edgecombe, i stap insait long dispela greduesen seremoni long lukim gutpela samting i kamap long Enga Tisa Kolis we Australia i sapotim.

Mis Edgecombe i amamas long ol sumatin i greduet long pinisim gut Setifiket long Elementri Tisa Trening.

'Australia i amamas long

sapotim Enga Tisa Kolis long luksave olsem planti tisa i gat gutpela save i ken helpim long pulapim ol spes long edukesen i no long Enga provins, tasol long Papua Niugini tu,' Mis Edgecombe i tok.

Mis Edgecombe i tok dispela Australia Awat Pasifik Skolasip em i narapela kain skolasip long PNG. Enga

Tisa Kolis em i wanpela bilong 25 PNG patna institusen we i save givim helt na edukesen trening long kantri.

Long 2013, olsem 900 ol pipel long PNG i bin kisim Australia Awat Pasifik Skolasip. Long dispela yia, 400 skolasip ol i givim long ol meri na man i stadi long helt na edukesen trening institusen long kantri.



Yut, Meri na  
Famili

Pastor  
Barbara Lunge

## Ol winman na meri long bilip

"BILIP em i olsem. Yumi save gut tru olsem, olgeta gutpela samting God i promis pinis long givim yumi na yumi wet long kisim, em bai yumi kisim tru. Maski ai bilong yumi i no lukim ol dispela samting, yumi save gut tru olsem, dispela olgeta samting i stap.

Tasol man i no bilip long God, em i no inap bihainim laik bilong God. Long wanem, man i laik i go klostu long God, em i mas bilip olsem God i stap, na em i mas bilip olsem God i save mekim gut tru long man i wok long painim em. (Hibru 11:1, 6).

"Orait yumi save, yumi harim tok bilong God na dispela i kirapim bilip. Na dispela tok yumi harim, em i kamap long maus bilong Kraus. (Rom 10:17).

Dispela graun i save wok aninit long tok God i autim. Yumi olgeta i mas kamapim hangre long bel bilong yumi long God i mas pulimapim yumi wantaim Tok bilong em na yumi bai inap long wokabaut long spirit olsem sampela ol winman bilong bilip we buk bilong Hibru sapta 11 i tok-tok long en.

"Bipo bipo tru, taim olgeta samting i no kamap yet, Tok i stap. Tok i stap wantaim God na Tok em yet i God. Long dispela Tok tasol God i mekim kamap olgeta samting. Na i no gat wanpela samting i kamap long narapela rot. Nogat.

Olgeta samting i kamap, em Tok yet i mekim kamap. Laip i stap long em, na dispela laip em i lait bilong ol manmeri. Dispela lait i stap long tudak, na tudak i no bin daunim em. Wanpela man i kamap, nem bilong en Jon. God i bin salim em i kam. Em i kam bilong autim tok. Em i autim tok bilong dispela lait, bai olgeta manmeri i ken harim tok bilong em, na ol i ken bilip. Em yet em i no dispela lait. Nogat. Em i kam bilong autim tok tasol bilong dispela lait.

Dispela lait em i lait tru na i save givim lait long olgeta manmeri, em i laik i kam long graun. Orait Tok em i stap long graun. Long dispela Tok tasol God i bin wokim graun, tasol ol manmeri bilong graun ol i no luksave long em. Em i go long as ples bilong em yet, tasol ol lain bilong en ol i no kisim em.

Tasol sampela manmeri i kisim em, em ol lain bilip long nem bilong em. Na em i givim namba long ol bai ol i ken kamap pikinini bilong God. Ol i no kamap pikinini bilong God long blut bilong papamama, o long laik bilong bodi, o long laik bilong man. Nogat. God yet i mekim ol i kamap pikinini bilong em. (Jon 1:1-14).

Olgeta pipel long Papua Niugini i mas tanim go bek long God na kisim tok bilong em we i save kamap long ol redio, sios, niuspepa na planti narapela rot.

Painim aut ol gutpela save na strong bilong yu insait long God taim yu toktok wantaim em na stadi long tok bilong em i kam long buk baibel.

Tupela pawa yu mas gat long yu inap gat pawa long spirit, em long TOK BILONG GOD na HOLI SPIRIT BILONG GOD. "Holi Spirit yet i save givim laip long ol manmeri. Bodi em i no inap helpim yumi liklik. Dispela tok mi givim long yupela, em i spirit, na em i gat laip." (Jon 6:63) Tok bilong God i gat pawa long kamapim samting taim em i bung wantaim Spirit.

"Tok bilong God em i gat laip, na em i wok strong i stap. Em i sap moa, na i winim bainat i gat tupela sap. Dispela tok i save sutim man i go insait tru. Em i go kamap stret long dispela hap twel na spirit i bruk, na long ol dispela hap skru na kru bilong bun i pas wantaim.

Olsem na em i save gut tru long olgeta tingting na laik bilong bel bilong yumi." (Hibru 4:12) Tasol bihain Holi Spirit bai i kam i stap long yupela, na yupela bai i kisim strong. Na yupela bai i autim tok bilong mi long Jerusalem, na long olgeta hap bilong Judia, na long distrik Samaria, na i go inap long olgeta hap bilong graun." (Wok Aposel 1:8).

Taim yu wanpela man o meri i pulap long Tok bilong God na Spirit bilong God, yu ken mekim wok olsem ol bikpela win man bilong baibel.

**Toksave: Sapos yu i gat wari, tingting planti, ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 79638276 o salim email long: lungeb37@gmail.com**

# Pot Mosbi Katolik Asdaiosis opim nupela hetkwata

**TUMORA Fraide na Sarere bai lukim ol Katolik pipel bilong Pot Mosbi Asdaiosis i wokim bikpela selebresen long opim nupela asdaiosis hetkwata bilong ol.**

Opim bilong nupela Asdaiosis opis i makim tu 50 yia bilong Pot Mosbi Asdaiosis.

Asbisop bilong Pot Mosbi Asdaiosis, John Ribat i tok em

i namba wan taim bilong Pot Mosbi Asdaiosis long gat gutpela opis bai i bungim wantaim ol wan wan opis em i gat long en .

Nupela Senseri bilding bai gat long em ol opis olsem Opis bilong Asbisop, Edukesen, Helt, Yut, Caritas, Pastorel Kodinesen, Propeti Divisen na moa.

Nupela opis ya i kisim ples bilong olupela Asdaiosis opis i bin stap long Boroko long 50 yia olgeta.


Asbisop Ribat i tok kos bilong dispela nupela hetkwata bilding em K4 milien. Long dispela, K3.5 milien em long sanapim bilding na narapela K500,000 em kos bilong ol fenitsa bilong sios.

Asbisop Ribat i tok ol wok lain nau ol i wok long pinisim ol wok, tasol ol wanwan opis i wok long muv i go long sindaun long nupela opis nau.

Em i tok long tumora Fraide, program bai stat wantaim bikpela Misa Lotu na ol sampela aktiviti, na long Sarere, ol bai wokim opisel opening bilong Senseri bilding.

## Jisas i trupela lait

...Skelim Krib wantaim ol gutpela pasin



**Long taim bilong blesim ol Krismas lait, Krib na ples, Asbisop John Ribat na Pater Lozario s.m.s. bilong Morata Katolik peris i go pas. Pater Lozario i toktok i stap taim NCD Gavana, Powes Parkop na ol sampela Kristen manmeri i stap pre wantaim ol**

.Foto: Nicky Bernard

OL pipel bilong Pot Mosbi siti nau i lukim gen Jack Pidik Pak i luknais tumas bihain long opening bilong laitim ol Krismas lait long dispela wik.

Ples i save lait gut stret na i save pulim ol pikinini, ol yangpela, ol bikpela na ol lapun manmeri i go na lukim ol kain lait i kamap na luknais tru long mekim ol pablik i luksave olsem yumi klostu kamap nau long Krismas.

Wantaim ol Krismas lait, haus we Mama Maria i bin karim Bebi Jisas em ol i kolim "Krib" i stap tu. Insait long Krib, i gat ol stetju bilong Mama Maria, Bebi Jisas i slip long bet ol i wokim long "hay" o gras we ol sipsip i save kaikaim, Papa Joseph, ol sefed o lain i save lukautim ol sipsip i go lotu long Bebi Jisas, ol sipsip na ol anjelo i kam wantaim gutpela nius na ol trupela king i kam long longwe ples long lotu long Bebi Jisas husat bai king na givim em ol naispela smel sanda na ol arapela presen.

Long opening ol Krismas lait na Krib, Asbisop bilong Pot Mosbi Asdaiosis, John Ribat na Pater Rozanio Menezes s.m.m. bilong Morata Peris i bin wokim lotu bilong blesim ol lait na Krib.

Pater Rozanio s.m.m i bin wokim toktok long taim bilong blesim Krib, lait na ples.

Bikpela toktok em i bin wokim long lait em, long bipo bipo yet na nau tu, ol lotu i yusim lait na tudak long ol rilijes ekspriens na moa yet, long ol gutpela samting, save na hop.

Tasol Pater Rozanio i tok ol Kristen i tanim lait olsem "Jisas em trupela lait i save bringim lait i kam long olgeta pipel. Taim Jisas i no stap, yumi save pudaun long tudak. Jisas tasol em i lait we tudak i no nap daunim. "Dispela lait i kamap, i no olsem lait i bruk i kam antap long skai, no gat. Tasol olsem pikinini long bel bilong mama. Nupela pikinini i kamap i bringim nupela laip na hop," Pater Rozanio i tok.

Em i tok dispela i no pikinini nating, tasol olsem Santu Luke i tok long Gutnius olsem " long taun bilong David tude, mama i karim wanpela Sevia na em i Krai na Lod.

Em i tok "yumi kisim lait long bilip bilong yumi i go bek long "manger" bet we Bebi Jisas i slip long en na lukim stat bilong salvesen bilong yumi na Sevia bilong wol.

Em i skruim tok i go long ske-

lim ol bikpela samting i kamap nau long PNG wantaim Krismas Krib na bel isi pasin, laik pasin, marimari, jastis na amamas.

Tasol em i askim na watpo long PNG we i wanpela Kristen kantri i gat planti pasin bilong paitim na bagarapim meri insait long famili na komyuniti?

"Taim pasin vailens i stap, i no gat God bikos vailens i makim "evil" o nogut pasin tru we i bagarapim ol manmeri long dispela graun," Pater Rozanio i tok.

Em i tok long pastorel plen bilong Asdaiosis go long olgeta peris insait long Asdaiosis long dispela yia, het tok em "Rispektim lo" na aninit long dispela, askim i go long olgeta Katolik manmeri long luksave long ol kastom, sivil na ol sios lo bikos ol lo i stap long lukautim yumi na yumi ken stap gut insait long famili, komyuniti na kantri.

Em i tok wan wan peris insait long Asdaiosis i karimaut ol awenes long lo wantaim ol woksop, ol semina na ol lekasa long kla gut long mining bilong ol lo na laikim, luksave na bihainim olgeta de insait long laip bilong yumi.

Pater Lozanio i tok stori bilong God i kamap man olsem

yumi na stap insait long wanpela famili i soim marimari pasin bilong God long yumi ol sin manmeri . Na long famili bilong Mariia na Joseph na Pikinini bilong God i kamap man em Jisas, tupela papa-mama i bin kamap ol lain bilong lukautim gut na famili bai stap seif na i gat kaikai, klos, ples bilong stap na ol kain samting olsem.

"Papa Joseph i no bin spak na paitim meri bilong em, o mekim nogut long pikinini bilong em, tasol em i lukautim em gut long stap seif, na i gat kaikai, klos, ples bilong stap na ol kain samting olsem. Mama Maria tu i no bin lokim dua na lusim Pikinini bilong em na go pilaim bingo n akas. Em i no bin westim taim long stori na tok baksait, tasol stap isi na lukautim gut pikinini na family bilong em.

"Sapos yumi laik bihainim pasin bilong Santu Famili bilong Nazaret, yumi mas bihainim pasin bilong Maria na Joseph.

"Long dispela Krismas taim, yumi mas soim olsem yumi bihainim ol Kristen velyu o pasin yumi painim long dispela "manger."



### HEPI BET DE MAMA

Dispela em i trupela stori i bin kamap long Saina long yia 2007. Wanpela meri nem bilong em Siu Lan. Man bilong em i dai pinis.

Em i gat wanpela liklik pikinini meri nem bilong em Lie Mei. Em i save olsem mama bilong em i no gat samting, olsem na em i save helpim mama bilong em long salim kek na narapela samting olgeta de long maket. Em i no laik givim hevi long mama bilong em tu.

Long wanpela winta moning, taim mama i pinis long wokim kek, em i save olsem olgeta beg i pulap pinis na em i go hariap long stua long baim wanpela beg gen.

Em i tokim pikinini bilong em long stap na wetim em long haus taim em i go long stua baim wanpel nupela beg gen.

Taim mama i kam bek, em i no lukim pikinini meri bilong em i stap long haus. Em i belhat na kros nogut tru na i tok "Wanpela bikhet pikinini. Em i no save harim tok. Em i save laip i hat tru tasol em i lusim haus na go pilai wantaim narapela."

Taim em i lusim haus na go salim keik bilong em, em i lokim dua bilong haus. Em i tok: "Mi bai givim skul long en. Em bai i no inap go insait long haus. Em i mas stap ausait inap long mi kam bek."

Taim mama i kam bek long salim kek bilong em, em i painim Lie Mei, pikinini bilong em slip kranki long fran bilong dua bilong haus. Em i ran na holimpas pikinini bilong em i kamap ston olsem ais pinis, em i dai pinis.

Em i krai nogut tru na sakim sakim bodi bilong pikinini. Tasol em i no kisim win moa.

Hariap em i karim pikinini i go insait long haus sakim sakim bodi bilong em na singaut strong kolim nem bilong pikinini Lie Mei.

Wantu tasol wanpela samting i pundaun long han bilong pikinini Lie Mei. Mama i kisim dispela samting i karamap i stap. Em i opim pepa i karamapim samting. Em i kirap nogut tru.

Insait long karamap, em i painim wanpela liklik bisket olsem Wopa wantaim wanpela olupela pepa. Antap long olupela pepa Mama i ritim wanpela tok: "Mi save olsem Mama i lusim tingting. Tude em i spesel de bilong Mama.

Mi bin baim dispela liklik bisket olsem presen bilong mi i go long yu. Mi no gat inap mani long baim wanpela bikpela Bisket. HEPI BET DE Mama!"

Dispela em i wanpela trupela stori. Ol i bin pablisim long wanpela deili niuspepa ol i kolim Xia Wen Pao-Saina long yia 2007.

- Sapos tingting nogut/negative tingting i bosim laip bilong yumi, em i bai bringim/kamapim regret insait long laip bilong yumi inap long indai.
- Olsem na, tingim na skelim gut bipo long wokim wanpela samting.
- Kros na belhat hariap em i wok bilong tang i lidim yumi long kisim bagarap.
- Mi hop dispela stori i givim gutpela skul long yumi wan wan husat i ritim dispela stori.



**KOMENTRI**


# Yumi luksave tu long ol lain i mekim wok bilong stopim HIV/AIDS

Desemba 1 em i bikpela de bilong makim Wol AIDS De. OI-geta kantri long wol na PNG tu i bung long tingim ol lain i dai pinis long dispela sik, na skelim ol program bilong daunim dispela sik nogut.

Ol saveman i tok tude i gat samting olsem 32,000 pipel long PNG i gat binatang bilong HIV. Tasol ol i ting i gat moa pipel husat i gat dispela sik tasol ol i no save yet. Nesenel AIDS Kaunsil Seke-teriet i tok namba bilong ol lain i kisim dispela sik i surik i go daun long 2000 nupela keis long wanpela yia. Tasol i gat sampela lain husat i wok long kisim dispela sik bikos long kain wok oli save mekim, olsem na i mas gat moa awenes i mas kamap long ol.

Sik HIV/AIDS i stap longpela taim nau long PNG. I gat sampela lain husat i kisim dispela sik na i stap laip yet na oli mekim wok bilong tokaut long ol pipel long rot bilong abrusim dispela sik na soim gutpela pasin long ol manmeri husat i gat dispela sik. Hia long PNG planti pipe i save pret tru long dispela sik. Na long taim o i harim olsem wanpela man o meri i gat dispela sik, ol i save mekim nogut long ol.

I gat lo i stap pinis long lukautim ol pipel husat i gat dispela sik. Palamen i luksave long ol hevi sik HIV/AIDS i save kamapim long ol komyuniti olsem na long 2003, ol memba i kamapim HIV/AIDS Management and Prevention Act (HAMPA). Orait, em i kamap lo



Jada 0151

long 2004. Wanpela man o meri husat i gat HIV/AIDS i ken kotim ol lain husat i mekim nogut long em.

Sik HIV/AIDS i no gat marasin inap long stopim em. Long taim man i kisim dispela sik, bai em i karim sik long bodi inap long taim em i dai. I gat ol marasin inap long helpim bodi bilong sikman na em i mas kisim ol dispela marasin olgeta de long laip bilong em.

Nesenel gavman wanpela tasol i no inap long mekim olgeta wok

bilong stopim dispela sik. Ol arapela lain tu imas givim han long stopim dispela sik i bagarapim kantri bilong yumi. Ol sios, na ol NGO grup i wok long helpim gavman nau long bikpela wok bilong stopim dispela sik. I gat tu ol intenesenel dona ogenaisesen i save givim bikpela mani tu long mekim ol wok bilong stopim HIV/AIDS.

Dispela sik HIV/AIDS bai i no inap long kamapim planti bagarap sapos yumi ol pipel tu i luksave

long ol rot dispela sik i save kalap i go long ol pipel. Kamapim awenes long ples na toktok long ples klia we ol yangpela i ken harim na banisim skin bilong ol. Ol sios i gat strongpela toktok long mekim long dispela sik, tasol ol i gat planti moa toktok bilong marimari na mekim gut long ol lain husat i gat dispela sik.

Helt dipatmen na ol lain i mekim wok bilong stopim HIV/AIDS, i wok long singaut long ol pipel i mas go

kisim test long lukim sapos ol i gat binatang bilong HIV long bodi bilong ol o nogat. Planti manmeri bai pret o sem long go kisim dispela test tasol em i wanpela rot bilong luksave long namba bilong ol pipel i gat dispela sik na helpim ol.

I gat bikpela wok i stap yet long stopim sik HIV/AIDS. Givim gutpela trening long ol helt woka na lukim olsem ol i gat inap marasin bilong givim ol sikman em i wanpela bikpela wok gavman i mas putim i go pas.

Planti taim yumi harim stori bilong marasin bilong ol dispela lain i pinis na i no gat nupela saplai long givim ol sikman. Pasin bilong wokim gutpela plen em i bikpela samting tu.

Sapos i gat rekot bilong hamas sikman i stap long wan wan provins na we ol i save kisim marasin, bai saplai i no inap long pinis hariap.

Bikpela luksave long dispela de bilong tingim ol lain i gat sik HIV/AIDS na ol wok bilong stopim dispela sik i mas go tu long olgeta wokmanmeri bilong helt, sios, ol NGO, yut grup, meri grup na ol komyuniti grup na ol manmeri husat i gat dispela sik.

Planti bilong ol i givim fri taim long mekim awenes long dispela sik na long kisim ol sikmanmeri i go long haus sik we ol i ken kisim test na stat long kisim ol marasin. Sapos yumi wan wan tu i mekim dispela wok, bai yumi inap long kontrolim dispela sik nogut long kantri bilong yumi.

## Manmeri mas tokaut long pasin korapsen

RIPOT o tokaut long pasin korapsen inap lukim Papua Niguini i "pulim win" na lukim sampela gutpela sindaun.

Pasin korapsen i olsem sik. Sapos manmeri i no tokaut, dispela pasin bai stap na bagarapim manmeri na sosaiti wantaim.

Papua Niugini inap kamap ples bilong ol gutpela rot, skul, haus sik, wok didiman, pawa, wara na wok bisnis sapos no gat bikpela pasin korapsen i kamap.

Bihain long 40 yia inependens, kantri i wok hat yet long lukim gutpela sindaun.

Nau yet taim yumi ritim dispela toktok pasin korapsen, sapos em i bikpela o kliklik i wok long kamap yet.

Bikos long tokaut sampela long ol pasin korapsen i pinis, planti i stap yet o sampela maski i pinis i kamap gen.

I no gat rot long pinis ol-



geta, tasol yumi inap daunim taim yumi i tokaut long ol pasin korapsen.

Planti na bikpela korapsen i save kamap long ol bikpela opis bilong Gavman na sampela taim long ol bisnis opis tu.

Pasin bilong paulim pablik man i stat long mani mak bilong handet Kina na bihain i go long tausen na nau i save kamap long mani mak bilong milien Kina. Dispela em planti mani tumas, inap long kamapim planti ol gutpela samting na stretim sindaun bilong manmeri.

Sampela pasin korapsen

em ol manmeri i tokaut em kot i painimaut na givim mekimsave long ol.

Sampela laki long i no bin gat ripot na kot i no painimaut na ol i raun i stap.

Tasol long gutpela pasin ol manmeri bilong Papua Niugini i laik lukim ol lain husat i paulim pablik mani i mas kisim mekimsave long pasin nogut ol i mekim.

Nogut long ol i amamas i stap na ol arapela manmeri i kisim taim nogut.

Planti bilong dispela ol bikpela paul pasin i save kamap long taim ol manmeri i giaman na tok ol i mekim ol pablik wok olsem wokim rot, bris, skul, haus sik o polis i bin bagarapim ol nating na olsem gavman i mas baim ol.

Ol i mekim kain giaman tok na gavman i baim ol nating long bikpela mani.

Gavman i bin kamapim Fainens Inkwairi long harim stori bilong wan wan ol manmeri husat i kisim mani

long gavman.

Sampela long ol dispela lain i bin kamap na tokaut long stori bilong ol.

Gavman i laik tokaut long Ripot bilong dispela inkwairi tasol kot oda bilong sampela man i pasim dispela Ripot long kamap pablik.

Long dispela ol manmeri husat i mas kisim mekimsave ol i hait na raun yet wantaim stil mani.

Long Fainens Inkwairi gavman i traim long tokaut na daunim kain pasin nogut.

Tasol dispela i no min tingting bilong tokaut long kain pasin i pinis.

Nogat. Nau yet pasin nogut i wok long kamap yet na olsem em wok bilong yumi olgeta long skruim na tokaut long ol pasin nogut bai i no ken kamap na bagarapim komyuniti bilong yumi.

Taim yumi i mekim olsem yumi inap lukim gutpela sindaun bilong yumi yet, famili, komyuniti na kantri bilong mipela.



Published Weekly, Thursday, for Word Publishing Company, Ltd.

P.O. Box 1982, Boroko, NCD  
Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Websait: [www.wantokniuspepa.com](http://www.wantokniuspepa.com)

Pe bilong wanpela yia, 52 niuspepa

|                       |             |
|-----------------------|-------------|
| <b>Ples:</b>          | <b>Air:</b> |
| PNG                   | K220.00     |
| AUSTRALIA             | US\$110.00  |
| ASIA PACIFIC na JAPAN | US\$150.00  |
| AMERICA na EUROPE     | US\$210.00  |

**General Manager**  
Elizabeth Konga

**Editor**  
Veronica Hatutasi

Published at  
Able Building  
Complex,  
Sec 58 Lot 02,  
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

# CPL Pride STRONGIM OL MERI!!



Olgeta 6-pela awod meri wantaim ol sponsa na ol lain i bin sidaun na makim stori bilong ol wina.

**Nicky Bernard i raitim**

LAS Wik Wantok Niuspepa i stori long tripela meri husat i save mekim bikipela wok long komyuniti bilong ol na CPL Grup i givim ol luksave. Dispela wik Wantok Niuspepa bai stori gen wantaim narapela tripela we CPL Grup i luksave long ol. Bikos 6-pela meri i bin winim awod.

**EDUKESAN ROLE MODEL**

Kori Maraga, em wanpela meri Sentral, na em i wanpela bilong olupela tisa long Papua Niugini. Misis Maraga i raunim PNG long wok bilong em olsem tisa.

Misis Maraga, i skulim planti ol bik manmeri nau ol i holim bikipela posisen long gavman na praivet sekta. Ol kain lain olsem Gavana bilong BPNG, Loi Bakani, biknem dokta, Dokta Matthas Sapuri, Palamen Memba Mark Mapakai, bipo oposisen lida Belden Nama, Seketeri bilong Helt Pascoe Kase na Isaac Lupari.

Misis Maraga i bin mekim wok tisa long 1973 i go inap long 1985 long sampela hap long Papua Niugini na dispela wok tisa em i laikim tumas. Long 1995 em i bin kam long bikipela skul long UPNG long kisim pepa bilong Basela bilong Edukesen, na em kisim long 1997 taim em greduet.

Misis Maraga i kisim sampela wok long sampela gavman na privet sekta inap long 14 yia olgeta na bihain em go bek long komyuniti bilong em na lainim ol pikinini. Em i lainim tu ol pasto long we bilong autim tok na trenim ol wantaim liklik toea em gat long en.

Misis Maraga i amamas long wok tisa long wanem em lainim sampela ol bik manmeri na holim ol bikipela posisen insait long kantri.

**ENVAIROMEN**

CPL Grup i luksave long wanpela yangpela meri Madang tasol em i wok na stap long Kikori long Galp Provins.

Yolarnie Ampepou i gat 27 krismas, na em i wok olsem envairomen saintis long lukautim ol longpela nus trausel bilong wara. Taim em pinisim skul bilong em olsem envairomen saintis long Australia, em no tingting long go bek long Madang. Em painim ples we i gat planti longpela nus trausel i stap long em na em i go stret long Kikori.

Yolarnie i save lainim ol ples lain long Kikori long we bilong lukautim ol dispela trausel. Planti bilong ol dispela ples lain em ol pikinini.

Em i kolim dispela projek long 'PIKU'. Em yet i kirap wanpela facebook pes long toksave long ol Papua Niugini manmeri long lukautim ol dispela trausel bilong wara.

Dispela wok bilong em i save karim em tu i go long Kutubu long lainim ol manmeri long Kutubu long we bilong lukautim ol dispela trausel aninit long lukaut bilong LNG.

Yolarnie, save bisi stret long wok bilong em long Mun Septemba i go inap Mas long narapela yia.

Em i no save mekim dispela wok tasol, nogat, em save bungim moa long 20 ples lain long Kikori na givim skul



Kori Maraga i kisim awod bilong em long han bilong Mis Lynda Babao-O'Neill na CPL Grup siaman Mahesh Patel.



Bikipela susa bilong Yolarie Ampepou i toktok long stori bilong liklik susa bilong em. Yolarie i no bin stap long kisim awod bilong em olsem na bikipela susa bilong kisim long nem bilong em.

long ol o holim miting wantaim ol. Em i kamap buk bilong dispela longpela nus trausel tu na givim long ol skul long Kikori long we bilong lukautim bus, wara na graun bilong ol.

Yolarnie em i yangpela meri, tasol em i no wari long stap long bus na wara bilong Kikori we planti yangpela manmeri bai les long stap long en. Em i tingting strong tru long Papua Niugini i mas lukautim gut ol dispela trausel bilong wara.

**YANG PNG**

DELISHA Koime em i wanpela bilong ol yangpela meri anausa husat i mekim we bilong em yet long kamap redio anausa.

Delisha i bin mekim ol pastaim wok taim krismas bilong em i daunblo yet. Dispela ol

wok em i save mekim i no stap strong long tingting bilong em. Bikipela tingting bilong em long toktok long redio na Papua Niugini i ken harim nek bilong em.

Long 2013 taim PNGFM i kamap nupela susa redio stesen bilong YumiFM na NauFM ol kolim long LegendFM, Delisha i go givim pepa bilong wok na em trening long kamap anausa bilong dispela Legend FM.

Delisha i save gut tru long ol olupela musik bilong bipo maskim em i yangpela meri bilong nau.

Em i save long pilaim musik na toktok long pulim iau bilong ol pablik. Long Epril bilong dispela 2015 em i muv i go long FM100. Long FM100 em tasol em yangpela meri na tu wanpela meri tasol long kamap redio anausa.

*Kisim luksave long edukesen, envairomen na yangpela PNG...*



Yangpela Delisha Koime wantaim awod bilong em.

Wok bilong em na toktok long F100 tu i opim ai bilong ol olupela anausa olsem Roger Hauofa na sampela moa. Delisha nau em yangpela meri anausa we planti ol anausa long FM100 i lukim em olsem em bai kamap wanpela gutpela anausa long bihain.

Olgeta yia CPL Grup i save luksave long ol meri husat i mekim bikipela wok long komyuniti bilong ol tasol nogat luksave save kamap long ol. CPL i save salim toksave long niuspela long ol komyuniti long luksave long husat meri i mekim bikipela wok na salim nem i go wantaim liklik stori bilong ol.

Dispela em namba 6 yia CPL Grup i kamapim dispela awod bilong ol meri. Putim was long husat mama o susa i mekim bikipela wok long komyuniti na redi long 2016 CPL Pride of PNG Women Award.

# Ol wol lida toktok long klaimet senis

**Ol wol lida i pasim tok long stopim ol samting i save kamapim hevi bilong klaimet senis we ol ples long graun i wok long hat. Presiden bilong Frans, Francois Hollande i tok wol i stap long mak bilong bruk nau long traim long stopim klaimet senis.**

Samting olsem 150 het bilong ol gavman, wantaim Presiden Barack Obama na Xi Jinping bilong Saina, i stap nau long dispela bikipela bung. Insait long dispela tupela wik, bai ol i toktok long ol rot bilong kamapim ikonomi bilong wol, we i no inap long yusim

tumas fosil fuel.

I bin gat wangepa kain miting olsem i bin kamap long Kopenhagen 6-pela yia i go pinis tasol ol kantri i no bihainim wanem ol samting ol i bin toktok long mekim. Olsem na dispela bung long Frans nau bai traim long stretim ol bikipela promis bilong ol na kamapim wok tru.

Namba wan bikipela samting ol i laik mekim em long daunim mak bilong kamapim ples i hat tru long wol bikos long ol smok nogut bilong ol fosil fuel ol kantri i wok long kamapim long ol faktori na transport sistem bilong ol.



Minista bilong Ikoloji, bilong Frans, Segolene Royale (l) Presiden bilong Frans Francois Hollande, Seketeri Jeneral bilong Yunaitet Nesens, Ban Ki-moon, Eksekutiv Seketeri bilong UN Framework Convention on Climate Change, Christiania Figueres i lukluk long taim ol lain i kamap long UN konpres long klaimet senis long Novemba 30, long Frans. Moa long 150 wol lida i bung long toktok long 21st Sesen bilong konvensen bilong klaimet senis (COP21/CMP11). Dispela miting i stat long Novemba 30 na bai pinis long Desemba 11, 2015.

## Rasia soldia hait long bus inap 10-pela yia

WANPELA man husat i bin soldia long ami bilong Rasia i bin ranawe long ami long 2003 na i hait insait long bikbus inap long 10-pela yia. Ol polis i holim dispela man husat i hait long bikbus long isten Rasia na i no tok save long ol famili bilong em.

Dispela man i gat 30 kris-mas na ol i no tokaut long nem bilong em. Em i bin sol-

dia long ami na i bin wok long Kamchakta peninsula long 2003 long taim em i ranawe.

Ol polis i tok dispela man i no go longwe, em i stap long Kamchakta we em i hait insait long bikbus. Em i save painim wok nabaut na i no traim long toktok wantaim ol famili lain bilong em.

Famili bilong em i ting em i lus na ol i wok long painim

bodi bilong em. Sampela mun bihain ol i bin painim wangepa bodi em ol i ting i bilong em. Famili i planim dispela bodi na ol i no moa tingim em inap ol i kisim tok save olsem em i stap laip yet.

Long lo bilong Rasia, ol soldia husat i ranawe long wok bai kalabus inap long 7-pela yia.



Bus we man Rasia i bin hait long en log 10-pela yia. Poto: ABC

## Ol loya laik putim suga takis long sof dring

PLANTI moa pikinini long Briten i pat tumas olsem na ol saveman i traim long painim ol rot bilong stopim dispela 'nupela sik.' Na ol loya i tokim gavman long lukluk long ol kain rot olsem takis long ol sof dring i gat planti suga tumas, na kontrolim ol promosen bilong ol kaikai i no helti tumas. Ol i ting dispela takis bai inap long mekim ol pikinini i stap helti na i no pat tumas.

Wangepa komiti husat i mekim dispela wok i tok long ripot bilong en olsem i mas gat strongpela lo long edve-



Ol kain swit dring i gat planti suga tumas long ol i kamapim sik patpela tumas long ol pikinini na ol bikipela man na meri long wol tude. Poto: ABC

taismen na maketing long ol sof dring na ol dispela sof dring i mas soim hamas tispun suga i stap insait long ol dring.

Ripot i tok planti pikinini i pat tumas na olgeta yia, gavman i save lusim bikipela mani tru long ol sik bilong ol dispela lain husat i pat tumas.



Presiden bilong Amerika, Barrack Obama amamas na sekan wantaim Seketeri bilong Yunaitet Nesens, Ban Ki-Moon long taim bilong Klaimet Senis miting long Peris, Frans. Poto: ABC

## Texas i no laikim ol Syria refuji

TEXAS, wangepa stet long Amerika i tok em i no laik kisim ol refuji bilong Syria na em i laik ol lain husat i mekim wok long salim ol refuji i go long ol stet long Amerika i no mas kotim gavana bilong ol.

Tasol dispela NGO grup Intenesenel Resku Komiti husat i stap long Nu Yok, i tok ol i no inap senisim tingting bikos ol lain refuji bai i go yet long Texas.

Dispela grup i tokaut olsem mobeta ol pipel i no

ken ting ol dispela lain refuji bilong Syria husat i laik go long Amerika em ol lain teroris. Gavana Greg Abbot na ol narapela Ripabliken memba i bin tokaut olsem bai ol i toktok strong long stopim ol dispela refuji bilong Syria bihain long ol teroris i bin kilim ol pipel long Paris, Frans long Novemba 13.

Presiden Barak Obama i no wanbel na tokim ol dispela lain long wangepa pas long Novemba 25, olsem

ol stet i no gat pawa long stopim ol dispela refuji na ol i ken kisim mekimsave sapos ol i sakim tok bilong gavman.

Moa long 2,200 refuji bilong Syria i kisim tokorait long go sindaun long Amerika inap long 4-pela yia nau. Moa long 200 refuji bilong Syria i bin go long Texas long dispela yia. Tasol planti bilong ol i go stap nau long Kalifornia na Michigan.

# Pilipino komyuniti amamasim Mosbi

Nicky Bernard i raitim

DISEMBA em planti ol manmeri na pikinini i save laikim long wanem, em taim bilong skul malolo na tu, sampela save kisim malolo long wok na amamasim krismas long ples bilong ol.

Insait long Pot Mosbi, amamas bilong krismas i kamap long pinis bilong mun Novemba taim eksen gavana bilong NCD, Powes Parkop, i lonsim 20 de bilong amamas insait long NCD.

Bipo long gavana i lonsim em i askim ol Pilipino komyuniti long traimek bilong ol wantaim ol singsing bilong krismas na ol Pilipino i no westim taim nogat. Ol bungim olgeta won-tok bilong ol na wanpela apiun ol go singsing long fran bilong nupela NCDC opis long soim olsem ol tu i bilong Pot Mosbi.

Dispela nek bilong singsing i mekim Gavana Parkop i wanbel na askim ol long singsing raun long sampela ol bilong Mosbi.

Long Mande nait, ol i mekim ol manmeri na pikinini long Jack Pidik pak i kirap nogut taim ol singsing antap long stet. Singsing bilong ol mekim ol manmeri i ting olsem ol i pilaim ol singsing long keset o CD, tasol nogat em nek bilong ol Pilipino komyuniti bilong Mosbi.

Ol Pilipino komyuniti bai pilai long Jack Pidik pak na Ela nambis long soim ol manmeri bilong siti olsem ol tu i ken singsing long amamasim krismas.



Ol Pilipino komyuniti bilong Pot Mosbi i bung long redi long singsing long Jack Pidik pak. Poto Nicky Bernard

## Stori bilong tumbuna

### Wok bilong Nokondi

**N**OKONDI em i sif bilong Isten Hailans – Goroka long bipo taim bilong ol tumbuna i kam inap nau long taim bilong mipela tu.

Taim ol hauslain i laik go pait long wo, ol i save bung long hauslain na i redim ol spia na ol bonara na wanpela lapun man i save singaut i go antap long haus bilong Nokondi na givim toksave olsem mipela ig o pait na i askim em long kisim tok orait.

Na taim em i givim tok orait long pait ol man i singaut na go long pait wantaim ol birua na ol i save winim dispela pait na kam bek na ol i save kilim pik na kapsaitim blut na i sav tok tenkyu long Nokondi long wanem em tasol i save go pas na em i “Warrior” man bilong pas long wo em wanpela wok helpim Nokondi i save wokim long Isten Hailans na nau em i stap yet olsem hetman. (Nokondi the chief of Goroka).

# Niugini Ice givim sans long ol Arts sumatim

Nicky Bernard i raitim

**OL sumatin bilong UPNG na sampela pablik i bin soim ol arts disain bilong ol long Lamana Hotel long las wik Fraide na Sarere.**

Tenkyu long SP Bruri long kamapim dispela so aninit

long bren bilong Niugini Ice.

Planti ol yangpela manmeri i bin kamapim kainkain ol Arts long bilas bilong provins bilong na tu, ol i bin tingim wanwan kalsa bilong PNG na ol mekim ol disain long ol laplap.


Niugini Ice na Lamana

Hotel i kamapim dispela fasen so long soim olsem kalsa na disain bilong yumi i ken pulim ai bilong ol manmeri long narapela kantri.

Tupela man na tripela meri i bin mekim ol disain long ol laplap, klos na trausis na 6-pela yangpela man-

meri i bin go soim long Sarere long Lamana Hotel.

Dispela ol disain bilas bai Lamana na Niugini Ice i ranim long sampela wik na bihain bai ol i tokaut long wanem disain i winim dispela Niugini Ice Fesen So.



Ol yangpela model i soim disain long laplap, klos, trauses na liklik tumbuna bilas bilong kalsa bilong PNG stret. Poto Nicky Bernard.

## Ol Saina man laikim stret tumbuna singsing bilong Madang

James G. Kila i raitim

**OL NUPELA** Saina wokman bilong bikpela kontrakta husat bai wokim kamap Pasifik Marin Industrial Zon long Widar i laikim bilong ol tu go narakain stret nek bilong ol asples meri Madang i singim ol tumbuna singsing long las wik Tunde long welkam long Praim Minista, Peter O'Neill.

Ol dispela Saina wokman i no save harim kain bungim nek tumbuna singsing bilong PNG. Em i namba wan taim tru bilong ol long harim na ol i bin amamas tru.

Ol i harim ol mobail fon bilong ol na rekotim ol singsing tumbuna na tu, ol naispela bilas.

Tru tumas nek bilong ol asples meri Madang i kukim stret lewa bilong ol bagaros bilong Saina. Sampela ol lain Saina man



Ol meri Madang singsing tumbuna na nek bilong ol i winim lewa bilong ol Saina man. Poto: James G.Kila i raitim

i bihainim stail bilong singsing na wokim nek bilong ol olsem ol meri Madang singsing na lap na amamas long dispela taim.

Ol meri Madang tu i bilas

nais tru wantaim retpela purpus na sakim sakim bodi bilong ol i go na wokim ol Saina man i amamas tru.

Moa long 10-pela singsing grup bilong ol lain long

nambis na bus klostu long PMIZ Projek i bin kamap long Widar long Tunde long soim welkam long taim PM

O'Neill i go lonsim projek.

### TOKSAVE:

WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/Word Publishing Company, P O Box 1982, BOROKO, NCD, PNG o email edres: [editorial@wantok.com.pg](mailto:editorial@wantok.com.pg) Telepon namba: 3252500.*

Tenkyu



# Em nau! Ol pikinini i ken painim rot i go long ples wantaim Wantok kru...



## Lapun Kanage i paul

Lapun Kanage ful dres na i raun i go wanatim ol poroman bilong em na ol i makim wanpela bet de pati. Ol i harim musik na danis long baksait long haus bilong poroman bilong em stap. Biknait nau na ples i kol nogut tru, Kanage i saik up tru long danis yet na kol bilong biknait tu i kilim ol, tasol ol poro bilong em i tokim olsem, "Kanage yumi bai stop long hia na yumi go malolo tumora em narapela de." Em i kirap tokim ol olsem, orait yumi go tasol inap wanpela bilong yupela i kisim Goat bilong mi long as bilong diwai. Olgeta i lukluk long ol yet na i tokim Kanage, yu nogat goat long as bilong diwai, mipela i ken lukim wanpela hap laplap o kolos. Em i kirap na tok em, em tasol dispela hap goat bilong mi, mi bin danis na putim long hap, ol poro bilong em i no isi long lap long wanem lapun Kanage i laik tok Coat na em tok Goat.

Meri Wanples

## Kanage bilong Tapini

KANAGE em bilong ples Tapini. Em wanpela bikhet man na planti taim save spak bikhet raun wantaim ol meri. Wanpela taim nau na ol lain long hausik i go long ples bilong Kanage long wokim sampela tes long painim aut sampela sik i kamap long Tapini.

Kanage wantaim ol skwad bilong e mi amamas na go wokim ol tes long ol medikol ofisa long clinic ol i sanapim long en.

Ol i pinis na wan wik bihain ol lain i kam bek long givim ol bekim bilong ol tes i go long ol lain manmeri long ples Tapini. Taim bilong Kanage na em i go kisim risalt bilong em. Taim em i lukim pepa e mi amamas nogut tru na kalap kalap i go antap.

Wanpela medikol opisa i lukim Kanage na tokim Kanage. "Mipla mas toktok wantaim yu long wanem yu i gat sik HIV/AIDS. Mipela painimaut dispela na tu mipela laik tok save olsem i gat marasin long kisim. Kanage lap nogut tru na tok, "Brats, nogat samting. Mi amamas long kisim ol bekim. Mi wok long wari olsem mi bai kisim sik kolera.



KANAGE pinis wok na em i kam kamap long haus. Boi em hangre kisim stret na em wok long tingting long kaikai rais na tinpis. Em i kam kamap long haus na singaun long meri Agnes long haus. Hey. Hegiles. Yu kuk da lais o lo. My bel is so laun laun and I wana sam kaikai.

Yu save. Meri bilong em save belhat nogut tru long em i kolim em Hegiles. Meri bikmaus na tok, "ei my wan. Det wan hau. I kuk da lais but you know det wan da dog.

It too was hungry too so I gave it da lais to him. Kanage belhat nogut tru na laik paitim misis blo em. "Leks taim, I will put you on da boat and you go bek to your Arlotau."



Meri harim na tok, em yu wan. If you send me to da boat, I will go falaway and yu det wan how. Yu will cry like one baby. Leks day you will kalap on the balus and come look for me ya. Yu cross for da rais okay yu go eat with the dog.

Ansa bilong Wod Pilai isu 2150



Stat hia

Yu pinis! Em ples bilong yu



Ol wod lista hia:

- AMAMASIM
- ALAWENS
- APINUN
- BAPTAISIM
- BAUTIM
- BUBU
- DEWEL
- FRENS
- GUMI
- HARIM
- HELT
- KAMAP
- KATOLIK
- KUKA
- LONGTAIM
- LONSIM
- MANGRO
- MARILA
- MUMUTIM
- PAPA
- PASBUK
- PINISTAIM
- PITPIT
- RENDO
- SKALIM

E O A V O A G D Z T J T J P E R N C L Q  
 X F C P V T G E H Y E H O L R D D N A P  
 L O N S I M L P A F O N F G T W L O N A  
 E Q E P E N D A X R N P G U N H I E Y Z  
 R K U K A T U N G F G X B C R T S N S S  
 E E S N Y P G N R Y H U V P E E T D N R  
 M F R E N S A P A S B U K R K F A E O A  
 S G H Y B M L S K N A M O E X J I E B Z  
 G X H E E K A E M S U C J E G E O P S B  
 A E I O L A W G U D T T S G N G G F O E  
 F S F B A T E P M I I E O T F C B L I E  
 U M H L M O N I U P M M G A F H K P W H  
 T L K G A L S N T D N G H N E A B P B A  
 N O A H M I I I I H D S H I X L N R R L  
 Z N M D A K P S M R E N D O W T N D A N  
 L G A T S E W T K E W H I R T W T G S A  
 O T P A I I F A E A E A C S I N N T S Q  
 C A B P M A R I L A L R G E G T G R O F  
 B I E U Z N I M S I D I O A Q Y R E F L  
 E M G E H J R A O V E M M R U B T A U L


# Kibung bilong PNG Sains na Teknoloji bai kamap

**PAPUA Niugini (PNG) Sains na Teknoloji Kaunsil Seketeriet na Australia Risets Kaunsil bai holim 2015 risonal bung bilong Global Risets Kaunsil (GRC) long Kenbera, Australia long tumora inap Fraide.**  
 Dispela em i nupela samting na gat bikpela luksave bilong PNG Sains na Teknoloji Kaunsil Seketeriet long holim intenesenel kibung, dispela em i namba wan taim long stap insait long stat bilong dispela tingting long

2012. Tupela PNG STCS na ARC i gat wankain wok long menesim na givim mani long ol program. Em i sans bilong PNG Sains na Teknoloji Kaunsil Seketeriet we i stap long developmen bilong wanpela nesenel sains na teknoloji s t r e t e j i k fremwok. GRC kibung bai painim aut ol sans bilong wok bung long nesenel risets, sains na teknoloji program. Ol GRC kibung i kamap namba wan forum bilong pablik risets ejensi bilong

givim mani insait long wol long stap insait long ol kain toktok. Minista bilong Haia Edukesen Risets Sains na Teknoloji, Malakai Tabar, bai i go wantaim ol PNG delegesen long dispela kibung. Sif Eksekutiv Opisa bilong PNG Sains na Teknoloji Seketeriet, Profesa Teatulohi Matainoaho bai stap siaman long dispela kibung long Kenbera. PNG Sains na Teknoloji Kaunsil Seketeriet na Australia Risets Kaunsil i tingting long kamapim

wok bung long polisi na teknikel edvais long risets na sains. Dispela Asia-Pasifik Rijonal Global Risets Kaunsil Kibung long Kenbera bai kamap pinis na 2016 GRC Anuel kibung long India bai kamap. Em bai givim sans long ol hetman bilong pablik- ol risets ejensi long rijon bai toktok long ol hevi i kamap long Risets Integreti, Risets Kepesiti Bilding na Kopresen long Asia-Pasifik, Ikwaliti na mak bilong ol meri long risets na insait long wok.



**MOSBI LAIT:** Gavana bilong NCD, Powes Parkop i kamapim gen amamas bilong krismas long Pot Mosbi. Long Mande em i onim ol krismas lait long Five Mile na Jack Pidik Pak long makim 20 de amamas bai kamap long NCD. Dispela 20 de amamas bai kamap long sampela hap long Mosbi we ol famili ken go sindaun na lukim. 20 de amamas bai pinis stret long Disemba 20 long givim taim bilong ol famili long amamasim krismas. *Poto stori Nicky Bernard.*

## Manga Peris Yut Kros Ministri laik kamapim senis

**Tony Sapan i raitim**

**RILIJES** Autris long het tok, "Rikonsiliesen na Rinyuwel aninit long Famili Ivanjelaisesen" we ol Siar/Manga Peris Yut Kros Ministri i kari-maut i wok long strongim na kamapim gutpela samting long ol Katolik manmeri long Sen Clement Pallie Peris insait long Lihir Ailan. Ministri i mekim wok long glasim na lukluk bek na i bihain wokabaut bilong Kruse i bin kamap long 6-pela yia i go pinis, namel long yia 2007 na 2009. Dispela i kamapim

senis long ol Katolik manmeri bilong Lihir we ol i wok long senisim ol pasin i no stret long gutpela bilong ol famili, komyunit na sios bilong ol. Wok na ol progrem we Ministri i kari-maut i bihainim disisen we Peris Kaunsel i bin wokim long traim kontrolim ol pasin nogut i wok long kamap, na sapotim ol sios na yut long wok wantaim long gutpela bilong ol. Peris Kaunsel i luksave long ol planti pasin nogut i stap pinis na ol nupela we ol maining na timba kampani bilong Santa Wan i kamapim.

Sampela ol pasin nogut em hombru, mariwana o spakbrus, bagarapim ol pikinini, ol samting nogut we mobail pon i kamapim, ol marit i bruk na ol yangpela i karim pikinini tasol ol i no laikim we ol i bilip i kamapim ol sosel, iekonomik na kalserele hevi long laip na sindaun long pipel bilong ol. Wantaim bilip olsem Bikman tasol i ken kamapim senis, senis i ken kamap na tu, lukim ol ekspiens bilong ol, 17-pela yangpela bilong Siar/Manga Yut Kros Ministri i wokim rot-mep we ol Katolik

manmeri long Kavieng Daiosis i karamapim tu Sen Clement Pallie Peris i ken bihainim long pulim bek ol sios memba long senisim laip na sindaun bilong ol i kamap gutpela. Wantaim fanding sapot i kam long lokol level gavman long Nu Ailan, ol Siar/Manga Yut Kros Ministri i ken kari-maut wok ministri bilong ol i go strong moa. Insait long tupela wok we ol i bin kari-maut ministri long 13-pela sios long Lihir Ailan, peris pris bilog ol, Pater Justin Amino i bin go pas long ol.



**KAIKAI DAS:** Planti rot long Pot Mosbi i wok long senis. Sampela olupela rot tu ol i mekim go nupela. Dispela poto i soim rot long Gerehu insait long Mosbi we ol kontrak lain i mekim olupela rot na kamapim dispela hap taim rot long ol kar i ran long en. Planti ol haus klostu long hap tu em kapa bilong ol i tanim go braun long dispela das rot. Ol kontrak lain tu i lus tingting long putim wara long kilim das. *Poto stori Nicky Bernard.*

## Bmobail-vodafon i tokaut long K50 diskaun bilong ol NCSL memba

**Philemon Tame i raitim**

**BMOBAIL-** Vodafon i givim Avvio 750 dual-SIM smatpon long ol memba bilong Nasfan Kontributas Seving na Lon Sosaiti Limited (NCSL) wantaim K50. Prais bilong dispela fon em i K149, tasol wantaim ol NCL memba, ol i salim dispela fon long K99 long ol NCSL senta. Ol fon ol i salim long diskaun prais bai stap long ol NCSL senta

long Pot Mosbi stat long asde, Trinde inap long ol dispela stok bai pinis. Sait bilong dispela promosen, NCSL Eplikesen em ol i putim pinis long dispela fon na ol memba bilong NCSL bai yusim. Dispela eplikesen bai helpim ol memba long go insait long ol sevis bilong NCSL kwik taim. Ol memba bai no inap long westim taim na go long ol NCSL senta long sekim balens o mekim

ol narapela wankain wok olsem. Bmobail- vodafon i putim pinis ol netwok bilong em long olgeta bikpela taun na ol liklik senta bilong PNG pinis na dispela i mekim isi long olgeta lain i yusim smatpon we ol i ken yusim long ol rimot eria tu. Bmobail- vodafon em i sasim liklik mani long ol lain husat i yusim data na ol narapela sevis long gutpela prais. Ol lain husat i gat

smatpon pinis em ol i isi long daunlodim NCSL Eplikesen long NCSL websait www.ncsl.com.pg, na ol i ken isi long go insait long seving na lon akaun infomesen. NCSL i amamas long mekim patnasip wantaim Bmobail-vodafon, na ol i gat bikpela bilip olsem patnasip bai gro bikpela na redim bikpela sans bilong tupela ogenaisesen wantaim kisim gutpela benifit.



**GUTPELA SAMTING:** Minista bilong Spot na Nesenel Ivens na Memba bilong Mosbi Saut, Justin Tkachenko i toktok long ol manmeri long setelmen Konedobu taim em go lonsim nupela Asosiesen bilong ol manmeri bilong Simbu husat i stap long dispela setelmen long Konedobu long Mosbi. *Poto Nicky Bernard.*

Polis na Difens mekim wok painimaut



OL polis na difens fos bilong Papua Niuginii kamapim wanpela investigesen tim bilong mekim ol wok painimaut long trabel i bin kamap namel long tu-pela long las wik Fonde nait long Pot Mosbi.

bilong polis i bin kisim bagarap na tupela polisman i bin kisim bagarap tu long dispela trabel. Ol senia pipel bilong polis na difens i laik dispela join-investigesen tim i lukluk go insait long dispela trabel na

bringim olgeta husat i kamapim dispela asua long ai bilong kot. Dispela investigesen bai lukluk tu long ol wankain pait namel long polis na difens fos soldia i bin kamap bipo.

Singirok i laikim strongpela mekim save

KOMANDA bipo bilong PNG Difens Fos, Jerry Singirok i laik gavman i senisim kriminal lo bilong givim ol strongpela mekimsave long ol polis na soldia husat i save kirapim pait na bagarapim wok bilong ol.

Jerry Singirok i mekim dispela toktok bihain long narapela pait namel long ol soldia na polis i kamap long Pot Mosbi.

Dispelpait i bin stat bihain long ol polis i bin sutim dai draiva bilong wanpela kar em wanpela soldia i bin stap insait long en.

Tupela narapela pasindia long dispela kar i bin kisim tu bikpela bagarap na ol i bin go long haus sik.

Mista Singirok i tok bai gutpela sapos gavman i kamapim ol strongpela lo bilong mekim save long ol memba bilong polis na difens husat i stap insait long ol kain kain trabal long komyuniti.

Em i tok wok bilong ol em long lukautim ol pipel na i no long kamap olsem hap bilong ol trabel long komyuniti.

Solomon Ailan i statim 16 De Ektivisim

OL kain kain ektiviti i wok long kamap long Solomon Ailan bilong makim 16 Days of Activism.

As bilong dispela bikpela de em long kempen long wol long vailens egen-sim ol meri na pikinini.

Praim Minista

Manasseh Sogavare i bin opimdispela 16 de bilong kempen long Honiara long las wik Trinde.

Dairekta bilong Vois bilong Mere NGO, Josephine Teakeni i tok em i amamas long lukim olsem olgeta nius lain long kantri i wok

long ripot long ol dispela ektiviti bilong kempen.

Bipo long dispela kempen i bin stat, olgeta i bin ranim wanpela woksop long Honiara bilong ol nius lain long pasin bilong ripot long jenda-beis vailens.

Vanuatu Presiden na ol lokal sif bung



Presiden Baldwin Lonsdale bilong Vanuatu i tokim ol sif olsem em bai no inap givim marimari long ol 14-pela Palaman memba husat i stap nau long kalabus.

Emi bin tokim Ekseketiv bilong Malfatumauri Kaunsil ovSif olsem em bai no inap marimari

long ol 14 memba bilong palamen husat i stap nau long kalabus.

Siaman bilong Port Vila taun kaunsil bilong ol sif, Isaac Worwor i tok Presiden Baldwin Lonsdale i tokim ol dispela taim ol i bungim em.

Mista Worwor i tok ol bin go lukim pres-

iden tu long tokim em olsem ol bai no holim rekonsiliesen inap long kot i pinis long harim olgeta keis long sait long dissolusen bilong palamen.

Port Vila niusman, Hilaire Bule i askim Mista Worwor long stori moa long miting bilong ol sif wantaim Presiden Lonsdale

Ol pipel i tok sori long bipo pait long bogenvil

OL pipel husat i bin bungim hevi na ol lain bilong Bogenvil Revoluseneri Ami (BRA) na Resistens bipo i bin wokim wanpela rikon-siliesen seremoni long Katukuh long hap bilong Siwai.

Manesa bilong New Dawn FM, Aloysius Laukai i tok samting olsem 300 pipel nau i stap long wanem em i kolim em i wanpela "moving ceremony" bilong marimari.

Laukai i tok planti pipel long ples nau i bin dai

long hap long Siwai long taim bilong Bogenvil Kraisis, sampela long ol em i ol mama na pikinini ol i bin kilim ol i dai taim ol i silip.

Tasol Laukai i tok olgeta pipel husati bin kisim hevi na ol lain bilong BRA, na Resistens husat i bin bung wantaim Papua Niugini Difens Fos i wanbel long ol i fogivim wanpela narapela.

Em i tok ol i wanbel long ol i muv fowod long bel isi pasin na redi long holim referendum long indipendans long gutpela pasin.



Indonesia i rausim politikal ektivis long kalabus

OL Wes Papua indipendens sapota i amamas tasol ol i ting Indonesia i gat narapela kain tingting.

Wanpela Wes Papua ektivis long Australia, i tok ol pipel bilong Wes Papua i amamas long gavman bilong Indonesia i rausim wanpela biknem politikal ektivis long kalabus, tasol em i tok tingting bilong Indonesia i gat narapela kain mining.

Ronnie Kareni i mekim dispela toktok bihain long gavman i bin rausim Filep Karma long kalabus long las wik Fonde.

Ol i bin kalabusim em long wanpela 15 yia long holim na apim Morning Star plak bilong Wes Papua sampela yia i go pinis, tasol nau em i go bek long ples na famili bilong en.

Mista Kareni i tok tu olsem ol strongpela toktok em ol pipel bi-

long Melanesia na ol narapela lain long Pasifiki wok long mekim egensim Human Raits abius i fosim Indonesia long rausim Mista Karma long kalabus.

Planti handet tausen pipel i dai pinis long Papua na Wes Papua long han bilong ol sekyuriti fos bilong Indonesia stat long taim Indonesia i bin kisim ol dispela ples 50 yia i go pinis.



Deeanne Enoch em i Mis Solomon Ailan



Deeanne Enoch em i Mis Solomon Ailan Wina bilong Mis Solomon Ailan Pejen Em i gat 23 krismas na i bilong Western na Choiseul provins.

Mis Enoch husat i wanpela lo studen long Yunivesiti bi-

long Papua Niugini i winim taitel bilong Mis Solomon Ailan long Sarere nait.

Em i bin winim narapea sevenpela yangpela meri husat i bin stap tu long fainel.

Memba bilong Mis Solomon Ailan

Pejen Komiti, Grace Hilly i tok nau bai ol mas redim Mis Enoch long sanap makim kantri long 2015 Mis PasifikAilan Pejen em bai kamap long Cook Ailan long Desemba.

# MRDC givim 150 bek rais long Daru pipel

## Aja Potabe i raitim

**MINERAL Risos Developmen Kampani (MRDC) i givim 150 bek rais long ol manmeri long Daru bihain long ples i drai na ol manmeri i bungim bikpela hevi.**

MRC aninit long Mineral Risos Ok Tedi Namba 2 (MROT 2) i baim dispela ol bek rais long Pot Mosbi las wik Tride long K6330.

Nupela ATR-72-600 balus bilong PNG Air i bin kisim ol dispela bek rais i go long Daru long las wik Fonde na lusim long han bilong Saut Flai Distrik Disasta opis.

Saut Flai Distrik Disasta opis bai skelim ol dispela bek rais long ol manmeri long Daru Ailan na sampela ol viles i stap arere long nam-bis.

Westen Gavana Ati Wobiro, Siaman bilong PNG Air Murray Woo, Sif Eksekutiv Opisa (CEO) bilong PNG Air Muralee Siva, Sif Komisel Opisa bilong PNG Air Paul Abbott na sampela wokman bilong MRDC i bin kisim ol dispela bek rais i go long Daru na i givim long Deputi



ATR balus bilong PNG Air i kisim i go long Daru 150 bek rais MRDC i baim long sevim Saut Flai manmeri long Westen Provins. Foto: Aja Potabe

Kodineta bilong Saut Flai Distrik Disasta opis, Segal Wape.

Klostu long 100 manmeri long liklik Daru Ailan amamas wantaim na i kam witness Gavana Wobiro i givim ol dispela bek rais long Mista

Wape long skelim long ol pipel.

Gavana Wobiro i tok MRDC, ExxonMobil na PNG Air i sapotim Westen provinsal gavman long kisim ol dispela bek rais i kam long Daru.

"Mipela i kisim 150 bek rais tasol i kam long givim long helpim ol manmeri bilong yumi long Saut Flai. Mi laik makim maus bilong ol manmeri bilong Westen na tok tenk yu long PNG Air, MRDC na ExxonMobil long givim dispela helpim," Gavana Wobiro i tok.

Mista Wobiro i tok Westen Provinsal Gavman i hat long kisim mani long PNG Sastenbel Developmen Program (PNGSDP) na sevim ol pipel bikos hai kot long Singapo i holim ol mani bilong pipel bilong Westen Provins.

PNGSDP i lukautim mani bilong pipel bilong Westen Provins tasol

wanpela kot namel long PNG Gavman na bod bilong PNGSDP i lokim olgeta mani bilong ol pipel bilong Westen Provins.

Mista Wobiro i tokim ol manmeri olsem MRDC, PNG Air na ExxonMobil i harim olsem ol manmeri long Saut Flai distrik i kisim taim na ol i baim dispela ol bek rais long soim olsem ol dispela kampani stap wantaim ol pipel.

"Dispela helpim i soim olsem ol dispela kampani i stap wantaim mipela. Yumi mas sapotim ol i helpim yumi taim yumi kisim taim," Gavana Wobiro i tok.

Mista Wape i makim maus bilong ol manmeri Saut Flai na tok tenkyu long Gavana Wobiro, MRDC, PNG Air na ExxonMobil long luksave long ol pipel taim ples i drai na nogat wara.

"Mipela i kisim bikpela bagarap stret. Ples i drai na olgeta wara i pinis. Tenkyu Gavana Wobiro long kisim dispela ol bek rais kam," Mista Wape i tok.

Ol provinsal gavman wokman na ol manmeri bilong Daru i bin kam long Daru ples balus long witnessim dispela bung.

## PNG Air em i bilong yumi: Wobiro

### Aja Potabe i raitim

WESTEN Gavana Ati Wobiro i tokim ol pipel long Daru las wik Fonde olsem PNG Air em i balus bilong ol pipel bilong Westen Provins.

Gavana Wobiro i tok ol pipel bilong Westen Provins i gat bikpela sea long dispela balus kampani aninit long Mineral Risos Ok Tedi Namba 2 (MROT2).

MROT2 em i wanpela sabsideri kampani bilong Mineral Risos Developmen Kampani (MRDC), we i save lukautim ol mani bilong ol papagraun bilong gol, ges, wel na risos projek insait long PNG.

MRDC em i bikpela sea-hola bilong PNG Air bikos em i gat 41 pesen sea holing insait long dispela balus kampani.

Gavana Wobiro i mekim dispela toktok long Daru ples balus las wik Fonde taim em i kisim 150 bek rais i go long



Westen Gavana Ati Wobiro na PNG Air Siaman Murray Woo i toktok wantaim Deputi Kodineta bilong Saut Flai Disasta Opis, Segal Wape (raithan) long Daru ples balus.

Daru long givim long ol manmeri Saut Flai husat i kisim bikpela taim bihain long ples i drai na wara tu i drai.

MRDC i bin baim ol dispela bek rais na PNG Air i no bin sasim mani tasol karim i go fri long Daru.

Mista Wobiro i askim ol wok manmeri bilong Westen Provinsal gavman long

yusim balus bilong PNG Air 'bikos em i balus bilong yumi yet.'

"Mi laik askim Provinsal Administreta bilong yumi na ol arapela senia gavman opisal olsem sapos ol i laik kisim balsu sata, ol i mas kisim PNG Air bikos em i balus kampani bilong yumi yet.

"Mani yumi yusim long

baim balus tiket long PNG bai kambek gen long yumi yet. Olsem nau PNG Air na MRDC i helpim yumi taim yumi stap long hevi," Mista Wobiro i tok.

Mista Wobiro i tok olgeta balus sata bilong Ok Tedi Maining bai go long PNG Air. Ok Tedi maining i pas bihain long ples i drai na mak bilong wara long Flai Riva i go daun.

"Taim ol i opim gen Ok Tedi Maining, PNG Air balus bai givim balus sata sevis long ol pipel bilong Not Flai na wok manmeri bilong Ok Tedi," Mista Wobiro i tok.

Em i tok PNG Air i save sevim ol pipel bilong Westen Provins na ol i stap strong yet long sapotim ol pipel.

"PNG Air no lus tingting long yumi. Ol i save sevim yumi na nau tu ol i kam helpim yumi taim yumi i sta long hevi," Mista Wobiro i tok.

## Balus kampani luksave long Westen manmeri



Lephan: CEO bilong PNG Air Muralee Siva i tokim ol manmeri Daru olsem PNG Air em i balus bilong PNG manmeri.

### Aja Potabe i raitim

SIF Eksekutiv Opisa (CEO) bilong PNG Air, Muralee Siva, i tok dispela nupela balus kampani i luksave long ol pipel bilong Westen Provins bikos ol i papa bilong dispela balus kampani.

Mista Siva i tok PNG Air i luksave long ol pipel bilong Westen Provins bikos ol i sea hola bilong dispela balus kampani.

Ol pipel bilong Westen Provins i gat sea bilong ol aninit long Mineral Risos Ok Tedi Namba 2 (MROT2).

MROT2 em i wanpela liklik kampani bilong MRDC, husat i gat 41 pesen sea holing insait long PNG Air.

Mista Siva i tok tenkyu long sapot bilong manmeri na provinsal gavman bilong Westen Provins long baim sea na bilip strong long bihain taim bilong PNG Air.

"Tenkyu long sapot bilong yupela. Sapos yupela i no bin sapotim mipela, dispela nupela ATR balus i no inap long kam long PNG na PNG Air i no inap long bringim ol gutpela senis long kampani," Mista Siva i tok.

Em i tok ol bod na menesmen bilong PNG Air i bin wanbel long baim nupela ATR balus bikos dispela

balus i gutpela tru long ran long kain kantri olsem PNG.

"Mipela laik putim manmeri bilong Westen Provins na PNG i go pas. Olsem na mipela i senisim nem bilong kampani i go long PNG Air.

"Mipela i baim nupela ATR balus bikos dispela kain balus i gutpela tru long ran long PNG. Sefti standet na gutpela lukaut em i gutpela tru stret," Mista Siva i tok.

Em i tok long yia 2016, PNG Air bai gat 3-pela moa ATR balus i ran long PNG.

"Mipela abi rausim olgeta Des 8 balus long flit. PNG Air bai gat ATR balus tasol long yia 2020," Mista Siva i tok.

Em i tok PNG Air bai stap wantaim ol komyuniti na tu helpim ol manmeri long mekim laip bilong ol i kamap isi.

"Planti ples insait long kantri bilong yumi i nogat gutpela rot. Balus em i save givim sevis long ol pipel na PNG Air i laik helpim ol manmeri PNG long kisim gutpela balus sevis," Mista Siva i tok.

Mista Siva i mekim dispela toktok las wik Fonde long Daru ples balus taim PNG Air i kisim 150 bek rais MRDC i baim long givim long ol manmeri Saut Flai distrik husat i kisim taim long hot san na drai weda.

## OTML givim K5 milien long Westen Provins

### Aja Potabe i raitim

OK Tedi Maining Limited (OTML) i tokaut olsem em bai givim K5 milien olsem donesen o helpim long baim kaikai bilong ol manmeri long Westen Provins husat i kisim bikpela taim bihain long ples i drai na saplai bilong kaikai i sot.

OTML i luksave olsem laip bilong ol manmeri long Westen Provins i no stap stret bikos drai weda na ples i hot i kamap longpela taim stret na dispela mani bai baim ol kaikai saplai long

givim long ol manmeri.

Mak bilong wara long Flai Riva i go daun na dispela i mekim hat long ol kago sip i ran i go antap long Kiunga wantaim ol kaikai saplai na arapela samting bilong Ok Tedi Maining. Dispela i mekim na gavman i pasim Ok Tedi Maining.

Wanpela komiti ol i kolim Interagency Disasta Kodinesen Komiti bai skelim ol kaikai saplai we dispela K5 milien bai baim.

"Ok Tedi Maining i amamas long tokaut olsem em i givim K5 milien long baim ol

kaikai saplai bilong ol manmeri long Westen Provins bihain long hot san na drai weda i bagarapim ples na laip bilong manmeri," Menesing Dairekta Peter Graham i tok.

"OTML na ol komyuniti long Westen Provins i save wokbung wantaim long gutpela taim na taim nogut na maski mipela i pasim opere-sen bilong maining bikos long drai weda, mipela i amamas long helpim ol manmeri long Westen Provins," Mista Graham i tok.

Ol arapela develop-

men patna na gavman ejensi tu i helpim ol manmeri bilong Westen Provins.

Las wik Fonde, Mineral Risos Developmen Kampani (MRDC) i givim 150 bek rais long ol pipel bilong Suat Flai distrik.

Pastaim MRDC i bin givim sampela kaikai saplai olsem bek rais, suga, tin pis na botol wara long ol manmeri long Tabubil na Ok Tedi eria.

Westen Gavana Ati Wobiro i tok ExxonMobil, divelopa bilong P'nyang gas projek, i tok long helpim ol manmeri long Not Flai.

# Kagamuga kamap intenesenel ples balus

## Aja Potabe i raitim

**KAGAMUGA ples balus long Mt Hagen, Westen Hailans Provins bai kamap namba 4 intenesenel ples balus insait long kantri, Praim Minista Peter O'Neill i tok.**

Bihain long Jackson's (Pot Mosbi), Tokua (Rabaul), Gurney (Alotau) na Komo, Kagamuga tu bai kamap wanpela bikpela ples balus

Praim Minista O'Neill i tok Kagamuga bai gat olgeta nupela samtung we ol arapela intenesenel ples balus i gat.

Na i no long taim, ol bai mekim ranwei bilong ples balus i go long-pela long larim ol bikpela balus i pundaun.

Mista O'Neill i mekim dispela toktok las wik Fonde taim em i opim dispela nupela teminal bilong Kagamuga ples balus.

China Overseas Engineering Company (COVEC) i bin kirapim dispela projek we Asian Development Bank (ADB) i bin fandim long K70 milien.

"Mi amamas nau long opim dispela nupela teminal bilong Kagamuga ples balus. Dispela nupela teminal haus bai kirapim ples balus bilong yumi i go antap long kamap intenesenel ples balus na em bai sevim ol pipel bilong Hailans rijon na manmeri Hagen," Mista O'Neill i tok.

Em i tok stat long yia 2016, Kagamuga bai gat dairek intenesenel flait i go long Indonesia na Australia na dispela bai kirapim planti sans long ol manmeri Hailans i kirapim bisnis.

"Mi laik tokaut olsem namba wan dairek flait i go long Jayapura long Indonesia bai kamap neks yia," Mista O'Neill i tok.

"Kagamuga bai gat ol dairek intenesenel flait i go kam long Australia. Ol manmeri bai no moa go long Pot Mosbi long kisim balus i go daun long Australia. Ol i ken stap long Mt Hagen na go kam long Australia" Mista O'Neill i tok.

Dispela tupela dairek flait i stap long Mt Hagen na i go long Indonesia na Australia i kamap bikos gavman i sainim pinis Air Sevis Agrimen wantaim dispela tupela kantri.

"Mi laik tok tenkyu long ol papa-graun long sapot ol i bin givim, kon-trekta COVEC na wokman bilong em, Nesenel Eapots Kopresen (NAC), akitekt o man husat i disainim dispela haus, na ADB long givim mani long kirapim dispela projek," Mista O'Neill i tok.

Em i tok gavman i wok long kirapim ol ples balus, rot na sip bris long Kokopo, Lae na Mt Hagen long kirapim dispela 3-pela planti sans long ol manmeri i mekim bisnis na stap gut long ples.



Nupela teminal bilong Kagamuga ples balus long Mt Hagen.



Tupela biknem singa bilong Pasifik, Jay Lieasi na Bianca Noka i singim 'Mipela i Famili'.

## DIGICEL selebretim famili long krismas

'We are Family' o 'Mipela i Famili', em i wanpela singsing bai kirapim PNG long kris-mas.

DIGICEL i wok long bringim ol famili na ol biknem musik lain bilong Pasifik long kam soim stail na talen bilong ol wantaim nupela nupela singsing, 'Mipela i Famili'.

Dispela nupela hap singsing em i wanpela naispela Pasifik singsing bilong Krismas musik, nau i stap long ol Digicel kastoma long 6-pela

kantri bilong Pasifik we PNG em i wanpela bilong ol.

Dispela bung bilong singsing i kisim biknem singa Jay Lieasi na stail singa Bianca Noka bilong PNG, Stan bilong biknem Vanuatu rege ben 'Stan & The Earth Force', 'Big Wilz na Fill' na ol daihat musik lain we i kamapim ben bilong Fiji 'Makare', Angela Afeaki bilong Tonga. Ol Onski Brata i makim Samoa na Abner, namba wan atis bilong Nauru i pasim lista bilong ol ilek-

trik miks lain.

Em i wanpela hap bilong bung maket promosen na dispela holide song i soim trupela kala bilong globol tredisen bilong taim ol famili save kam bung wantaim long dispela spesel taim insait long yia. Em i wanpela bikpela toktok bilong Digicel holide kempein.

"Long Digicel mipela i klia long wok bilong famili long holide sisen. Long dispela yia mipela laik selebretim ol famili na wanem kain wok ol i

gat long laip bilong mipela," Digicel Esia-Pasifik CEO, Michael Murphy i tok.

Dispela em i rot we ol pren na famili long Pasifik inap long amamas na stap wantaim. Krismas em i taim bilong bung wantaim famili na holim selebresen. Dispela song i stori moa long ol spesel hap bilong Krismas bilong Digicel na Pasifik; em i samtung bilong lewa, sol, laip, pasin bilong laikim, na pasin bilong helpim narapela.

## Divelopmen bai kirapim moa bisnis

### Aja Potabe i raitim

PRAIM Mlinista Peter O'Neill i tokim ol manmeri long Mt Hagen na Hailans rijon long yusim gut ol gavman sevis na kirapim bisnis bikos dispela em i sans tru long ol manmeri i statim liklik bisnis, mekim mani na kirapim gutpela sindaun.

Praim Minista O'Neill i tok Kagamuga ples balus em i wanpela gavman sevis we bai bringim planti sans long larim ol manmeri long Mt Hagen na Hailans rijon i kirapim bisnis.

Mista O'Neill i mekim dispela toktok las wik

Fonde taim em i opim nupela teminal bilding bilong Kagamuga ples balus long Mt Hagen.

Bihain long em i opim nupela teminal bilding bilong ples balus, Mista O'Neill i bin lukluk raun long ol rot projek insait long Westen Hailans Provins.

"Kantri bilong yumi i wok long senis hariap tru. Na ol dispela senis i wok long bringim ol sans bilong mekim bisnis we bipo dispela kain sans i no bin stap" Mista O'Neill i tok.

"Ol manmeri long Hailans i save mekim gutpela bisnis. Pasin bilong

mekim bisnis i stap pinis long blut bilong ol na mi save olsem ol bai yusim gut ol dispela sans na mekim bisnis.

"Ol nupela rot na nupela ples balus gavman i kisim i kam insait long provins em long larim ol manmeri i gat gutpela sindaun na mekim gutpela bisnis.

"Maski globel ikonomi i no stap stret tasol insait long kantri bilong yumi planti ol gutpela samtung i wok long kamap na dispela i soim olsem sans bilong kirapim bisnis long PNG em i bikpela tru," Mista O'Neill i tok.

"Maski yu stap long taun na siti o long ples, planti gutpela samtung i wok long kamap long kantri bilong yumi. Nau em gutpela taim long ol manmeri long yusim dispela sans na mekim bisnis," Mista O'Neill i tok.

Long dispela raun bilong em long Mt Hagen, Praim Minista O'Neill i opim nupela Mt Hagen (Kagamuga) Intenesenel ples balus, brukim graun long kirapim nupela Kagamuga-Keltiga 4-len haiwe na em i bin i go long Kotna-Baiyer rot we em i bin toktok long planti manmeri long Kotna ples.



# Madang gavman na Woks Dipatmen amamas long Ramu NiCo stretim Yakina bris

**MADANG** Provinsal Gavman i amamas tru na tok tenkyu i go long Ramu NiCo Mensesmen (MCC) Limited long givim bikpela helpimlong stretim Yakina bris long Madang- Ramu haiwe.

Provinsal Edministreta, Daniel Alo i wantaim Menesa bilong Madang Provinsal Woks Dipatmen, John Sitapai i bung long givim tok tank yu igo long Ramu NiCo Limited na presen wanpla certificate bilong tok amamas long gutpwla wok Ramu NiCo i wokim ananit long olgeta lo bilong Woks rot mentenens.

Mista Alo i tok olsem Ramu NiCo em wanpela strongpela na namba wan patna bilong divelomen wanpela bilong ole em maintense bilong Yakina bris insait long Provins.

Mista Alo i tok olsem dispela wok bilong bris i kamap ananit long Memorandum ovAndastening (MOU) namel lo kampani na Provinsal Gaaman long stretim bris hariap na dispela i lukim Ramu NiCo i kwiktaim tru long kamapim.

Long wankain taim tu Mista Sitapai i tok tenkyu long Ramu NiCo Ltd long wokim gutpela

wok long rot na long sapot bilong em long stretim rot na bris insait long Provins.

Mista Sitapai, long taim long givim setifiket i tok olsem olwok kamapim i a karamapimwok olsem fabrikesin, welding na strongim ol pos na bet blong bris long ol karim i ken ron antap o yusim.

“Ramu NiCo i wokim tu wok olsem restoresen na ol arapela teknikol wok blong bris,”

Mista Sitapai tok.

“Kampani i yusim tu ol masin bilong ol olsem loder, krein, na mobail woksop wantaim olgeta welding wok-masin bilong en,” Sitapai tok.

Mista Sitapai tok tu olsem Ramu NiCo i yusim tu ol trak, kar na ol supavisa, wantaim ol enjinia, na ol wokman bilong en na tu sekuriti long wok kamap dispela bris projek project i kamap gutpela.

Em tok ol wokman bilong em tu i go long wok ples bilong stretim

bris na helpim long supasais long ol wok Ramu NiCo i wokim.

Mista Sitapai i tokaut olsem long lukluk bilong em wok i kamap gut stret bihanim olgeta lo bilong Woks Dipatmen wantaim sefti lo we i stap insait long MOU na tu wok pinis insait long faive (5)pela dei tasol.

Em i tok tu olsem MOU wantaim Dipatmen ov Woks na Ramu NiCo i wok long gro strong yet na em i amamas tru long strongim, na lukautim gut na wokim igo bikpela long gutpela na strongpela laikim pasin.

Mista Sitapai tokim Ramu NiCo olsem pasin blong wok-poroman namel long tupela bai go het ya na stap longpelataim.Dispela bai kamapim tu kamap gutpela pasin bilong wok bung wantaim and wokim kamap gutpela sindaun long wok ol wokim.

Deputi Jeneral Menesa bilong Ramu NiCo Komyuniti Afes (CA) Dipatmen, Yuan Zhi i tok tenkyu long Madang Provinsal edministresin na Madang Provinsal Woks Dipatmen long gutpela luksave long wok Ramu NiCo i kamapimna i givim luksave pepa o setifiket.

Ramu NiCo long ol yia I go pinis I bin yusim ol risoses bilong en yet olsem masin na trak na tu ol wokman long stretim rot namel long Madang-Ramu Haiwe.

Dispela I soim koporet halivim dispela divelopa long Madang provins I wokim long sapotim sosio-ekonomik divelopmen insait long provins.

Long ol yia I go pinis taim rot I bin bagarap long Kawawar maket, Ramu NiCo I hariap long go stretim. Wankain taim tu, taim bikpela tait warai bagarapim ples Naru, Ramu NiCo I yusim masin bilong en long stretim ples arere long Naru riva long wara I ken ron gut na noken bagarapim rot.

Ramu NiCo I soim olsem em I no kam long Madang long kisim ol minerals tasol. Em I kam long helpim komyuniti long Madang tu long sait long sapotim divelopmen na infrastraksa blong provins we ol pipel I ken amamas.

Dispela I strongim het-tok bilong Kampani, em “Wanpela Ramu NiCo, Wanpela Komyuniti”




Ol wokman na masin bilong Ramu NiCo (MCC) redi long wok long Yakina bris.



Ol enjinia bilong Ramu NiCo lukluk long wok blong stretim flua blong Yakina bris.

Madang Provinsal Woks Menesa Mr John Sitapai, wokim woksekap long bris na toktok wantaim Ramu NiCo (MCC) lid-enjinia long Yakina bris long Madang-Ramu haiwe.



# NIP tisa kisim mangro na klaimet senis risos buk

Stori na poto I kam long WCS

OL tisa long Nu Ailan provins nau bai inap long skulim ol sumatin insait long ol praimer na sekenderi skul long bikpela wok bilong mangro na klaimet senis.

Dispela gutpela samting i kamap bihain long provinsal edukesen bod i bin givimaut tupela kain hanbuk long ol tisa long mun Oktoba.

Taitel bilong tupela hanbuk em 'Klaimet Senis Adaptesen Tisa Risos Buk' na 'Namba wan edisen bilong Stori bilong ol Mangro: Wanpela tisa risos buk bilong Lowa Praimer'.

Wail laip Konsevesen Sosaiti (WCS) na lokal patna bilong en NGO Risets na Konsevesen Faundesen PNG (RCF) i bung long kamapim dispela tupela risos buk.

Australia Dipatmen bilong Foren Afes na Treid (DFAT) i bin givim mani long kamapim ol dispela buk na long givimaut long ol skul.

Sif Eksektiv Opisa bilong Edukesen sekta long Nu Ailan, Bau Wallace tokaut long taim bilong provinsal edukesen bod miting long Oktoba.

WCS Nu Ailan i givim pinis ol hanbuk i go long ol skul long Kavieng taun, na ol skul arere long Buluminski haiwe na Namatanai distrik. I gat 26 skul long dispela eria husat i kisim ol buk pinis.

Het tisa bilong Ngavalus praimer skul long Buluminski haiwe, Elsie Rakum i kisim ol dispela buk na em i tok olsem ol saiens tisa bai kisim gutpela



Ol tisa bilong Livitua praimer skul sanap kisim poto wantaim WCS opisa Nerrie Mana (namel) long taim bilong givimaut ol buk.



Elsie Rakum, het tisa bilong Ngavalus praimer skul i kisim ol buk.

helpim long ol dispela risos buk. Misis Rakum i tok ol buk bai givim moa save long ol tisa na helpim ol long redim ol lessen bilong ol long mangro na klaimet Senis long skulim ol sumatin.

Ol skul i stap long ol ailan olsem Tikana na Lavongai LLG tu bai kisim ol dispela buk. WCS Nu Ailan i wok long plen long go long lukim ol skul insait long ol dispela eria.



Linda Warange (raithan), het tisa bilong Lugagun praimer skul na wanpela gret 7 sumatin i makim ol sumatin long kisim ol buk.

# Pasifik Ailan man winim Konsevesen Awot

WANPELA man bilong Fiji, Alifereti Tawake i winim WWF Konsevesen Awot bilong Duke bilong Edinburgh long dispela mun.

Dispela bikpela awot bilong WWF i luksave long Alifereti Tawake long pasin bilong lukautim komyuniti konsevesen we olgeta kantri long wol inap long bihainim. Em i wanpela marin risetsa bilong Kadavu na man bilong toktok strong long komyuniti i mas senisim pasin bilong yusim solwara.

Long las wik em i kisim dispela bikpela luksave bilong WWF wantaim Duke bilong Edinburgh Konsevesen Awot, olsem luksave bilong olgeta wok em i save mekim insait long ol komyuniti long rijon antap long graun na long solwara wantaim.

Dispela maus man bilong Fiji i tok dispela awot em i bilong opim ai na singaut long moa eksem i mas kamap bikos planti handet milien pipel long Pasifik i kisim strong long solwara.

Tawake i bin helpim ol komyuniti long kamapim Lokal Menes Marin Eria Network (LMMA) 15 yia i go pinis. Em i kamapim dispela kain wok bilong helpim ol nambis komyuniti husat i wok long kisim



Wina bilong Duke bilong Edinburgh Awot, Alifereti Tawake.

taim long kaikai na mani we ol i save kisim long solwara, i wok long go pinis na i no planti moa.

"Em i no longpela taim i go pinis long saientifik komyuniti na ol gavman i les long bilip olsem ol

komyuniti inap long go pas long mekim samting," Tawake i tok.

"Tasol dispela awot i luksave long wanem samting ol komyuniti inap mekim sapos yu givim sans long ol, na wanem samting ol inap long givim long globol wok bilong lukautim dispela graun," em i tok.

Tawake i tok moa olsem awot em i kisim i makim olgeta lokal lida bilong ol komyuniti husat i soim gutpela pasin bilong lukautim graun na solwara insait long planti yia. Gutpela we bilong lukautim ol netsurel risos bilong wol em long strongim ol komyuniti.

Long Fiji tasol, em i stat long Verata distrik, na i go long 450 komyuniti long kamapim Fiji LMMA nau i wok long yusim wei bilong menesim olsem; stopim ol samting bilong painim pis we i save bagarapim enviromen, daunim ol samting i stap long graun we bai bagarapim solwara, na long banisim sampela eria bilong solwara.

LMMA Network tude i stap tu long Filipins, Indonesia, Papua Niugini, Maikronesia, Palau, na Solomon Ailans na wantaim moa ailan kantri i wok long kamapim network tu.

Singaut bilong LMMA nau i wok

long kam long Saut Is Esia, Afrika, Sentral na Saut Amerika. Tawake i go long Madagascar las mun long helpim ol long wok bilong LMMA network.

Tawake i kisim luksave bilong Duke bilong Edinburgh Awot wantaim Dokta Alasdair Harris, faunda bilong Blue Ventures, husat i wok long strongim LMMA long Madagascar.

Yolanda Kakabadse, Presiden bilong WWF Intenesenal i tok, "Tupela wina i soim pasin long wok wantaim komyuniti, bisnis na gavman, mipela inap long stretim ol bikpela hevi nau i wok long bungim laip bilong solwara.

Save bilong ol long bungim marin saiens wantaim save bilong ples, long kamapim ol isi wei bilong bihainim Wol Waid Fan (WWF) globol marin konsevesen wok."

"Wanpela taim nogut em i wok long kam.

Na sapos ol gavman na ol lain i gat mani i no hariap long sapotim wok bilong ol komyuniti long menesim ol risos bilong ol, dispela awot bai kamap wanpela mak bilong sem, na i no bilong kisim biknem, bikos yumi save long stretim hevi tasol yumi no sapotim," Tawake i tok.

# Ovinou i makim las Olimpik pilai

**RAYMOND Ovinou em i wanpela pilaia husat i bin joinim Papua Niugini Olimpik Komiti long yia 2012 na i bin statim pilai long London.**

Bihain long 3-pela yia, Papua Niugini Judoka i bin kamap olsem narapela pilai long Olimpik Gem na nau dispela pilai bai kamap long yia i kam, 2016 long Rio de Janeiro.

Dispela em i namba tu taim bilong Ovinou long pilaia long Judoka long Olimpik Gem na em i laspela pilai bilong em long Tim PNG.

Em i bin pilai long yia 2012 i stap nupela yet long tingting bilong em na dispela bai strongim tingting bilong em long pilai long Rio Olimpik.

Ovinou i bin pilai gut na nau em i bin i go insait long intanesenel kwalifai iven na i gat inap strong long pilai long dispela namba tu na las pilai bilong em.

"Dispela em i las Olimpik pilai bilong mi na mi bai pait gut tru," Ovinou i tok.

Taim Ovinou i bin tromoi birua bilong em i go daun long namba wan pait, em i bin lukluk long kirapim ol yangpela pilaia na promotim kod bilong Judo insait long PNG.

Ovinou i save makim maus bilong Tim PNG na i save resis long Pasifik Gem, Komonwel Gem na Olimpik Gem em i bikipela samting em i save mekim na em i lukluk long skelim dispela save wantaim ol nupela jeneresen i kam long kamap pilaia bilong Judo.

Em i save gut long wanem as ol lain i save hat wok na givim planti



**Raymond Ovinou i sanap wantaim wait klos long han sut na em i wanpela pilaia tasol long spot Judo long Tim PNG. Piksa i soim em i pilai long London long yia 2012, na em i namba wan taim bilong em long pilai long Judo aninit long Tim PNG. Nau em i redi long resis long namba tu na las raun bilong em aninit long Tim PNG long Olimpik Gem bai kamap long yia i kam, 2016 long Rio de Janeiro.**

taim long wok bilong ol. Dispela em i bikos ol i laik kamap namba wan lain long wanem wok ol i save mekim long en. Wankain tasol Ovinou i bin mekim olsem na i kamap wanem kain man nau em i stap long en.

Em i bin stap wantaim long ol resis i bin kamap olgeta taim long ol intanesenel hap bilong pilai we ol i save lukluk long disiplin na kisim

ol namba wan risal.

Presiden bilong Judo Federesen long PNG, John Jambert, i tok, "Ovinou i bin trening strong tru long stat bilong dispela yia na em bai soim skil bilong em long pilai long Rio."

Sampela promis em i bin mekim long taim bilong trening i bin soim long London, tasol birua bilong em i gat planti ekspiriens na i lukim gut

long ol wanem kain eksen Ovinou i bin mekim.

Em i bin kamapim histori long PNG olsem em i namba wan PNG Olimpik pilai long spot Judo.

Mi bin gat strongpela bilip tru long 2012, tasol mipela olgeta i save skul long ol ekspiriens mipela i save gat long en. Nau mi save gut long wanem samting mi bai mekim na wok wantaim ol skil na teknik

long resis long dispela level," Ovinou i tok.

Ovinou i stap namba 122 ples insait long wol na em bai resis long 66kg divisen. Em i wanpela pilaia tasol long Judo long Tim PNG, husat bai makim maus bilong Tim PNG na bai pilai long Rio.

Em bai go insait long 3-pela resis na 4-pela trening kemp long 2015, na narapela 4-pela resis na 3-pela trening kemp long 2016 long kamap kwalifai long go long Rio.

Em i bin go insait long tupela iven pinis long dispela yia, 2015. Dispela tupela iven em Osenia Judo Union Open Sempionsip na trening kemp i bin kamap long Wollongong, Australia long Novemba 13 na 14.

Na tu, em i bin go pinis long Jeju, Korea long Judo Gren Prix i bin kamap long Novemba 26 inap 28, na intanesenel trening kemp i bin kamap bihain long dispela resis.

"Ol resis na rul bilong intanesenel level i wok long senis olgeta taim na em i gutpela long em i go het na pilai long dispela hap long resis wantaim olgeta wol," Jambert i tok.

"Mi stap wantaim long ol dispela intanesenel trening kemp na resis bikos mi laik save long moa skil na teknik wankain long ol birua pilaia bilong ol narapela kantri," Ovinou i tok.

"Mipela bai traime long kisim em i go long Japan long trening na, sapos Raymond i trening gut, em bai trening yet long 2016 inap long gem bai kamap long Jun," Jambert i tok.

## Lewas i daunim Tailan

PASIFIK MMI PNG Lewas i daunim ol asples Tailan wantaim 7-pela wicket long Intanesenel Kriket Kaunsil (ICC) Wol 20 Kwalifai pilai bilong ol meri i bin kamap long las wik Mande.

Lewas i winim tos na i salim Tailan i go long bat.

Lewas i boulim ol Tailan i go aut wantaim 6/70.

Norma Ovasuru i kamap top boula bilong ol Lewas na i rausim 3/13 aut long 4-pela ova bilong em.

Opena bilong ol Tailan Naruemol Chaiwai i topim ol skoa wantaim 25.

Lewas i daunim mak bilong ol wantaim 17 ova.

Ovasuru i mekim na ol i winim dispela pilai we i no gat wanpela tim i daunim ol na ol i topim ol skoa wantaim 36 ran.

Tasol, Lewas i lus wantaim 8-pela wicket

taim ol i bin pilai wantaim ol Skotlan.

Lewas i bat long namba wan, tasol tingting bilong ol i trabel taim tupela opena bilong ol Norma Ovasuru na Varoi Morea i no kisim wanpela skoa.

Ol wicket i wok long go daun na ol i boulim aut ol Lewas wantaim 53 ran bihain long 19.2 ova.

Sibona Jimmy i topim skoa bilong ol Lewas wantaim 13 ran

Ol i no ran gut namel long ol wicket i mekim na Lewas i lusim 4-pela wicket na i ran aut.

Abtaha Maqsood bilong ol Skotlan i kamap namba wan boula husat i kisim 2/9.

Skotlan i no gat wanpela trabel na isi tru kisim 15.4 ova na lusim tupela wicket tasol taim ol i pilai.

Pauke Siaka na

## Gigira i daunim ol FC POM 3-2 long ekstra taim

**Philemon Tame i raitim**

WANPELA gol insait long tupela minit ekstra taim i givim Gigira Laitepo Yunaitet 3-2 win na i daunim ol FC Pot Mosbi long las gem bilong raun namba tu long Telikom Nesenel

Soka Lig (TNSL) i bin kamap long Bisini pilai graun long las wik Sande.

Gigira i skoarim wanpela poin bipo long hap taim 1-0 na i stap pas we pilaia bilong ol Gigira, July Elijah, i kisim dispela poin long namba 34 minit.

FC Pot Mosbi i bekim skoa bilong ol we pilaia bilong ol FC POM, Jamal Seeto, i bin putim tupela gol na ol i stap pas gen 2-1 long 69 minit.

Pilaia bilong Gigira, Ian Yamum, i levelim skoa wantaim wanpela gol bihain long wanpela minit.

Tupela tim i stap dro na ol i bungim pinis bilong pilai.

Pilaia bilong ol Gigira, Moses Arisim, i no laik daunim tingting bilong tim bilong em na i sanap ausait long penelti boks na i kikim bal strong stret i go insait long tupela gol pos.

## Nupela stedium i kamap long Alotau

EKTING Minista bilong Spots, Labi Amaiu, i opim nupela Habona Gaige Stedium ol long Alotau, Milen Be provins long las wiken.

Memba bilong Alotau, Charles Abel, i tok dispela stedium em ol i bin givim nem bihain long Habona bikos long tingim em olsem em i wanpela tru pikinini man bilong Milen Bei.

Abel i tok, stedium i strap long Alice Wedega Pak em ol bai yusim long pilai ragbi na ol narapela spot ektiviti wantaim ol

bung bilong sios.

"Bos bilong taun kaunsil long Alotau bai lukautim dispela stedium," Abel i tok.

Abel i givim wanpela bikipela kar tu aninit long DSIP fan long helpim ol taun kaunsil long kari-maut dispela wok.

Ol i bin kamapim dispela stedium wantaim mani inap long K2 milien.

Nesenel Geming Bod i givim K1milien na ol narapela mani i kam aninit long DSIP fan bilong Mista Abel.

## Australia i givim nem long ol skwat bilong Wes Indis Tes

NATHAN Coulter-Nile i kisim ples bilong Mitchell Starc, na long wankain taim, ol Australia i givim nem long ol skwat bilong pilai egensim ol Wes Indis Tes long Hobart.

Nile i joinim 12 man pek na dispela pilai em i namba wan pilai bilong em.

Nile i bin kisim ples bilong Starc bikos Starc i bin kisim bikipela bagarap long rait lek bilong em long namba 3 Tes taim ol i bin pilai egensim ol Nu Silan long Adelaide.

Ol selekta i makim ol skwat olsem James Pattinson, em i namba 12 man bilong Adelaide Tes long Tunde.



**Nathan Coulter-Nile em ol i bin putim em i go insait long Australia Tes Skwad bilong pilai egensim ol Wes Indis long Hobart. Piksa: Getty Images**



# Erema kam bihain na win

Nicky Bernard i raitim

**GALP Erema FC i kam bihain wantaim skoa 2-1 na winim Huawei PS United 3-2 long Telikom Nesenel Soka Lig long Bisini soka graun las wiken.**

Erema FC i bin skoa pas long namba 10 minit long namba wan hap, dispela namba wan gol bilong ol i kam long wanpela kros kik long winga bilong ol na painim stret het bilong straika bilong ol na em hetim go insait.

Banis bilong PS United i no stap gut tumas na mekim ol Erema i kam insait long gol mak bilong ol klostu klostu, tasol Erema i no painim taget bilong ol.

PS United i kisim tupela gutpela sans bipo long hap taim na skoarim tupela gol na mekim ol Erema i paul long pilai bilong ol. Long hap taim PS United i go pas long skoa 2-1.

Long namba tu hap tupela tim wantaim i strongim banis bilong ol

inap long namba 15 minit bipo long pilai pinis, Erema i kisim wanpela kona kik. Dispela kona kik i painim stret het bilong wanpela pilaia bilong Erema na em hetim bal go insait stret long gol net bilong PS.

Tupela tim i dro 2-2 na mekim banis bilong ol tu i go strong tru long ol straika bilong ol i painim hat long brukim.

Eremas FC i kisim wanpela gutpela bal long kros kik gen na painim straika bilong ol we i nogat wanpela bek lain bilong PS FC i stap long stopim em. Straika bilong Erema wantaim gol kipa bilong PS tasol na straika bilong Erema i kikim go insait long gol long mekim skoa 3-2.

Erema FC i mekim namba wan win bilong bihain long ol i lus long anmba wan pilai bilong NSL, PS FC tu i mekim namba wan lus bilong ol bihain long ol winim pilai bilong long namba wan pilai bilong NSL.



Winga bilong Erema FC i traिम long abrusim winga bilong PS United. Erema i win 3-2. Poto Nicky Bernard.

## Midia Pul bai go bikpela long 2016



Sempion tim bilong 2015 Midia Pul, Cool Graphic i kisim win tropi long han bilong Minista bilong Sport Justin Tkachenko. Poto Nicky Bernard.

Nicky Bernard i raitim

MIDIA Pul i pinisim sisen bilong ol long las wik wantaim presentesen bilong long Lamana Hotel long las wik Tride nait.

Cool Graphic em namba wan tim we i winim gren fainal bilong 2015 wantaim susa tim bilong em Not Is Mira.

Not Is Mira i kisim namba tu ples wantaim maina primias trofi taim ol bin stap antap long lata inap long fainal kamap.

Midia Pul resis i save stat long namel bilong yia na pinis long Novemba olgeta yia. Dispela yia em bai 11-pela yia dispela

kompetisen i bin kamap.

Long prisentesen nait, Spot Minista Honarobal Justin Tkachenko i bin kamap long givim aut sampela prais long ol winim na tu em givim sapot bilong gavman long strongim dispela pilai bilong ol ol nius manmeri wantaim K40,000.

Em i tok em i amamas long ol nius manmeri long kamapim dispela pilai na mekim i go bikpela tru long 11-pela krismas olgeta.

Long makim maus bilong City menesa, ekting siti menesa, Honk Kiap, tu i tokim ol pilai manmeri olsem NCDC i save stap

namel long midia pul na ol tu i gat tim long dispela resis na em putim sampela mani long helpim strong dispela kompetisen.

Memba bilong Not Is i no bin stap long dispela nait tasol em salim wok man bilong em long givim tu liklik sapot bilong em long dispela kompetisen wantaim long K10,000.

Midia pul bai go bikpela na bikpela moa yet long 2016 taim kompetisen i stat. Siaman bilong kompetisen i singaut long olgeta midia haus long put tim long wanem dispela kompetisen ol bilong ol na i no bilong ol autsait tim.

Linking our Country  
LinkPNG extra services to WAPENAMANDA now open for booking  
Friday 08th January and 13th January 2016  
Monday 21st December and 11th January 2016



Reservations - Toll Free: 1800 5455 Email: sales.linkpng@airniugini.com.pg  
Find us on Facebook: www.facebook.com/linkpng Online sales: www.airniugini.com.pg



Sempion bilong las yia. Lae Siti Dwellers em i sempion bilong Telikom Nesanel Soka Lig (TNSL) long yia i go, 2014. Dwellers i daunim ol Goroka Gosiha long raun namba 1 bilong TNSL sisen bilong 2015- 2016 i bin kamap long Sir Ignatus Kilange Stediam long Lae, Morobe.



Holim strong; Yangpela weilifta i hapim weit i gat moa long 50 kg na i holim strong long Spots Ekspo i bin kamap long Sir John Guise Stediam Indo Kompleks long las wik Fonde inap Sarere. Dispela Spots Ekspo em bin long ol i givim nem long redi long go resis long PNG gems bai kamap long Kimbe long yia i kam.



Noken givim sans; Olgeta pilaia bilong Tim Hekari i bung wantaim na ranim bal. Ol i no bin givim liklik sans long birua pilaia bilong ol long kisim bal.




Kikim lek na brukim; Pilai bilong Tim Hekari bilong Telikom Nesanel Soka Lig (TNSL) i kikim birua pilaia bilong em taim em i abrusim bal. Tupela poro pilaia bilong em i stap baksait long sapotim em long pait long bal.



Hapim moa yet; Wapela meri tasol i joinim weilifting na i hapim weit long soim olsem em i fit long hapim ol weit i gat moa hevi na em i hapim moa yet na i winim het bilong em na i go antap tru. Planti meri i bin givim nem bilong ol long hapim weit olsem Dika Toua i save hapim.



Strongim olgeta masol na hapim; Dispela yangpela man i gat 15 krismas husat i laik hapim weit moa long 50 kg. Ol yangpela husat i givim nem bilong ol long tren long weilifting i gat krismas mak long 10 yia na antap.



**IMPROVED TASTE!** Niupela teist wantaim planti mit na oil. Teistim na bai yu laikim moa yet.

# DIANA

Tuna



Emi tuna  
bilong PNG

PROUDLY  
PNG  
MADE

Manufactured by



RD Tuna Canners Ltd.

Moa mit na  
oil insait



TUNA IN OIL

## LBL i mekim komyuniti autris program

Philemon Tame i raitim

Lig Bilong Laif (LBL) i mekim komyuniti autris program long las wik Fraide wantaim ol yangpela man insait long Tokarara eria long Pot Mosbi.

Dispela program i makim Wait Ribon De, i save kamap long Novemba 25. Ol i kamapim dispela program long stopim vailens egensim ol meri.

Long dispela de, ol man i go pas na skulim ol narapela man long stopim dispela birua pasin we ol man i save kamapim birua egensim ol meri.

Ol i bin makim Tokarara long karim aut dispela toksave bikos planti ol yangpela bilong Tokarara eria i stap long mak bilong kamapim dispela kain birua pasin. Tasol dispela pasin i stop liklik bikos awenes program bilong stopim vailens egensim ol meri i kamap bikpela na strong pinis.

LBL em i spot bilong developmen program we Nesanel Ragbi Lig Australia i stap long Papua Niugini i save go pas long en.

Australia gavman i save putim mani long ranim dispela program long ol skul insait long 4-pela rijon bilong PNG olsem Nesanel Kapitel

Distrik (NCD), Goroka, Isten Hailans, Is Nu Briten na long Otonomas Rijon bilong Bogenvil.

Ragbi lig em i wanpela tul we ol i save yusim long sapatim edukesen long kamapim gutpela kaikai.

Developmen opisa bilong NRL i save wok bung wantaim ol tisa long kamapim LBL program long wan wan tem. Ol i save skulim ol pikinini i save stap wantaim disabiliti long pilai olsem ol pikinini i no gat bagarap long bodi bilong ol.

Ol i save pilai long ol pilai graun na mekim ol wok insait long klasrum we em i isi long ol i ken mekim.

LBL nau i painim nupela sans bilong ol sumatin i save stap wantaim disabiliti long pilai long ol ragbi lig ektiviti na kirapim tingting olsem ol i orait na stap bung wantaim long ol dispela ektiviti.

Ol i save menesim LBL long 3-pela rot olsem patnasip namel long Australia Gavman, Nesanel Dipatmen bilong Edukesen aninit long PNG Gavman na NRL.

Ol grup husat i sapatim dispela program em Gavman Dipatmen na Edukesen, Otonomas Rijon bilong Bogenvil, PNG Ragbi Futbal Lig (PNGRFL), Yunivesiti bilong PNG na PNG Nesanel Spot Institut.



Piksa i soim yangpela mangi long Tokarara komyuniti i lainim ol skil bilong kikim bal long ragbi gem bihain long Lig Bilong Laif i mekim awenes program long stopim vailens egensim ol meri.

● Lukim spots poto long pes 27 ● Ovinou i makim las Olimpik pilai

## Mitsubishi FUSO Rosa Bus



Apgrad ensin  
130Hp  
4 silinda disel



**Ikamap Wantaim  
26 na 30 Sit**



Hariap nau na go long  
Boroko Motors dila bilong yu

PIKSA EM BILONG ILLUSTRASEN WOK TASOL

Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048  
Kimbe PH: 983 5035 | Madang PH: 422 2659 | Kokopo PH: 982 8193 | Goroka PH: 532 3552

Email: info@borokomotors.com.pg  
Website: www.borokomotors.com.pg



MIP1513307-18 rev